

## 2 Korid# Korid# Mwaalyaraav+na Poli Pikarya Pigasaalya' Yidavakesi.

<sup>1</sup> Korid# Mwaalyaihi, nya'mweihi  
 Polinyi Gotiyare simunyavi Kiraazitiyai  
 Jizaazai gaminyineba nyidaasadeinyi  
 nyidahlakakeinyi pikarya da'  
 yihithawasawaabe. Nimi neya'mwei  
 Timotilyi sainaai Gotiyare kusilaanyaviyaihi  
 anga Korid# mwaaihasaihiyi Piroviji Giriza  
 yuneba Gotiyare tewaanyara mwaaihasaraji  
 saihirina yihithiwoi. <sup>2</sup> Gotiyai Neni maangelyi  
 Naanga Jizaazai Kiraazitiya kwalyi yanga  
 gaimwange'na tewaanna yihika! Yakilyiyagaa'  
 kwaamu'nanyaburi tewaanna yihimwaaihika!

*Gotiyai kugaimwaga' Poli suya widake'nesi.*

<sup>3</sup> Gotiyari yilaaya nayaa maryaana! Sai  
 Gotiyai nemire Naanga Jizaazai Kiraazitiyari  
 Ganimaangelyi. Yi sai Nimiwai kale'na  
 gaimwanga naange'na aaya kaavilyalyi. Yi sai  
 Gotiyai a'mwe yuyaraavire simunyavi taanginya  
 yuyanna yivaimwadelyi. <sup>4</sup> Sahwai yuya  
 taanginya neyima'nadengina nemire simunyavi  
 nayaa neyivaimwadelyi. Sarevidaa'nyi Gotiyai  
 nemire simunyavi neyivaimwadevaabisavi  
 yi nemi sareina a'mweraavire simunyavi  
 taanginya gazasa' kininnakeraavi yiniga  
 wi'na yivaimwagaanneine. <sup>5</sup> Neyivaimwade  
 sa' dare'nanyi. Daanga naange' Kiraazitiyai

maarakesi. Nabaai nemi kwainaji ma'daanyasi. Yi daange' yune naanga ney+ma'nadevaai+ y+ nabaai Kiraazitiyari+ nemire simunyavi y+vaimwangebwi yune naanga ney+ma'nade'nanyi. <sup>6</sup> Nabaai nemi taanginya' maraaja daza' Gotiyai sariminyine simunyavi y+hivaimwagya'nesi sahwai y+hivadaihasamaarya'nesi sara y+ma'nade'nanyi. Yi nabaai Gotiyai nemire simunyavi ney+vaimwagaza' y+ sa' sarimire simunya kir+viji y+vaimwagathesi. Nabaai Gotiyai sarimire simunyangi kave kihyoji y+ nemi daanga ma'daanyabaaibi' sarimi sasare maapija' diraginna daavapiji nayaa jide'nanyi. <sup>7</sup> Nemi dara yawi'manigo. Sarimi daange' nemi ye'mwannamaa'manigatabaaibi' nabaai sarimire simunyavi nemi nyiji y+vaimwangebwi d+neye'mwannamaaryideihilyi. Yi sare'na nemi diraginna dara yemwaidaanyi. Yi sarimi diraginna d+thaayideihilyi.

<sup>8</sup> Sare' darevinyi. Nya'mweihi, nemire simunyavi dara yawi'manigo. Nemi nyi Piroviji Eziya dazavi ney+ma'nake' taanginya dazavina sarimi jaw+ranganyila! Taanginya naanga sa' namarulawakakesi. Yada yi nemire diraginyavi nebulya'na wav+lava'. Sarev+daa'nyi y+ nemi dara yawiro. Nemi gaalyaina mwalaadeina daaka! Nemi balaadeinera. <sup>9</sup> Naanga nebulya'nanyasi. Nemi saina taanginya' y+ bwak+manigo. Yaw+ bwa'dei mena dakabaaibi' nemi balaade'na. Yi Gotiyai "Kumi kunnya diraginya sabwina nyaw+ral+mwagap+dika! Aawa. Nimi a'mwe bain+keraavi ayahi

yîdîkaa'dînyainyî nayaa yawîralîmwagapîka!"  
 kada' sasare sa' yîma'nakesî. <sup>10</sup> Kayaa'nanaanga  
 daza nemînyî kayaa'na neramakadaasî  
 Gotîyai sahwai nemînyî ayîna nevadai-  
 hasamaarakelyî. Yî nabaai dahaa' sahwai  
 kuna nevadaihasamaa'manîkelyî. Yî nemî  
 sahwarina diraginna limwadaa nayaa dara  
 yemwaaimanîgoînera "Yî nabaai dîvi kîgaasî  
 sahwai ayîna nevadaihasamaarakelyî."  
<sup>11</sup> Yî sarîmî Gotîyarî wîja'na nemînyî  
 nayaa ye'mwannanegaimwadaapîjî sara  
 nevadaihasamaarakelyî. Sarevîdaa'nyî Gotîyai  
 a'mwe kwalaalyaraavîre yîdaanganya' kadîka  
 wî'nada yî sahwai yanga tewaanna neyaja'na yî  
 yuya kwalaalya dazara wî'napîjî yî nemînyîna  
 Gotîyarî "Su! Su!" wîdîpî'derera kwala  
 naangera. Yî "Sare' yîma'nana!" dona yîhîthîwo.

*Polî Koridî mwaalyaraavî kwaasî mujake'nesî.*

<sup>12</sup> Sare' darevînyî. Nemî nemînyîne  
 yaya' munyaba makinya' yaasîwa'na mî'.  
 Aawa. Sare' daresî. Nemîre simunyai  
 padaihirakyai dara jalîkurakadelyî. Kwaaka  
 davakî mwaalyaraayawî nemî kaanya  
 yamaryadaanyanna nawî'nya yagoinera. Yî  
 nabaai sarîmînyî nawî'nya naanga yagoinera.  
 Yî daresî. Gotîyai nemînyî tewaanaanga  
 sabwinajî yîda'nanya nebulya'nanyabwinajî  
 nejaavadevurî sara yagovulyî. A'mwe  
 kîlaakejîkîyabulyîyaraavîre sîdusabwi  
 nemarîma'naabadevwi mî'. Aawa. Gotîyare  
 yune yanga gaimwange'na negaimwadaasî  
 nemî kaanya sasara yamaryoinera. <sup>13</sup> Sare'

darevinyi. Nemi sariminyina yagaala ge' yida'daanyaina mi'. Aawa. Yagaalya' sarimi yiniga wi'na dangadivisagaa' yagaala savire aaya kaavilyavi jawiranganyideihilyi sa' sahirina. Yunegaa' sarimi neminyina nebulya'na jawiryideihilyireva diraginna limwadi yemwaahe. <sup>14</sup> Sinnawi sagaa' neminyina maali'na yawiretabaabi' yi yunegaa' nebulya'na jawiryideihilyi. Yi daresi. Nemire Naanga Jizaazare Yirikeriki sarimire nayaa dimwaalyide'na nemi sariminyine yaya' munyaba makilaadevaabi' yi sarimi nemi Gotiyare yagaalya' makaboinaavine yaya' munyaba dimakilyideihilyi.

<sup>15</sup> Yi simunya dzasarevi diraginna dara yawirakiwa'de. Sinnawi sariminyawidaasi wideinyira. "Yi pigasaai yanga gaimwange' maapika!" da'muji sariminyawinna ayina wideinyira. <sup>16</sup> Yi saba nimi mwaala'muji yihyahalya'mava'muji Maazathoniyana kaanya yamarya'na wideinyi. Yi Maazathoniya yagalya'mava'muji pigasaai sariminyawinna ayahi bideinyi. Yi nimi sariminyina yawi'manige. Niminyi kamaranyaasapiji nimi Juthiyana wide'nanyi. Sara yawirakiwa'de. <sup>17</sup> Gatha'darevaka! Sara yawirakiwa'de kiri' sariminyawinna mabiwa'de. Sarevidaa'nyi nimi yagaalya' gazare diwa'deinyi daaka! Aawa. "Sara yideinyi," nebwinada'dinyainyi. A'mweraavire kilaakejikiyabwina yawirakadinya "Nimi yagaala dadi 'Yo! Yo!' kiri' 'Aawa! Aawa!' simunyavi yawiri'ma!" dadi yawirakadinyainyi daa! Aawa. "Sara

yideinyi,” dena yiwa'deinyi. <sup>18</sup> Gotiyai nebulyabwi limwaga'devi nemi kwainaji nebulya'na widadaanyainera. Yi yagaala sa' sariminyine' yihithadaanya' maangevi “Yo!” wa'dori kiri' simunyavi “Aawa!” yawi'manigo' mi'. <sup>19</sup> Sare' darevinyi. Gotiyai nebulya'na yadere Gawaalivaangei Kiraazitiyai Jizaazarina sariminyaba nemi yihiziwaakolyi. Yi nimiji Saailaazalyi Timotilyi saina yihiziwaakoi sahwai pigaa' “Yayo!” pigaa' “Aawano!” kininnakei mi'. Aawa. Yuyagaa' sahwai gamire yune naanga nebulya'na daka yuya sangina “Yayo!” kininnakelyi. Yuyagaa' nebulyabwi kininnakelyi. <sup>20</sup> Sare' darevinyi. Gotiyai yune naanga nebulya'na wijaake gazasa' yi Kiraazitiyai “Yayo!” daka yunebanna sara yakelyi. Sahwari kumire “Yayo!” wiwari'. Sarevadaa'nyi Kiraazitiyari Gotiyai yune naanga nebulya'na wijaake yunebanna yima'nake'na Gotiyar'ne yaya' makilya'neina Gotiyari widadaanyi. Nebulyasi. Sara yima'nana! <sup>21</sup> Yi Kiraazitiyari wilaamwaihovi neminyi yi sarimi kwaihiriji diraginya neyvaimwadei yi yune gami sai Gotiyalyi. Yi sai neminyi dahilakya'nei gannya Kuryari nemire minyaginyangi dingakelyi. <sup>22</sup> Sahwai neminyina yawi'na “Sahwara diraginna dara yawipika! ‘Nebulyasi. Nemi Gotiyareinera. Neminyi diraginna nemaredaa'deiner.’ ” Sara yawi'na yaka gamire yavikwajike' nejaavada nemi sara yima'nya'neinaavina gannya Kuryari yanga nejaavakelyi. Nabaai nemire simunyangi sinnawinya'bisai Kurya

Tewaanyari# nejaavakelyi#. Gotiyai gannya yuya nejaaya'nenna Kurya Tewaanyai pimaginiya naangeva' mena nejaavakelyi#. Yi nemi# dara yawi'daanyi#. Naanga nebulya'nanyasi#. Gotiyai gannya Kurya Tewaanyari# nejaavake'na d#vi yuya nejaavadelyi#.

<sup>23</sup> Nabaai n#mi# sainyi# Gotiyai sasarei n#mi#ny#ne jal#kurakya'neri# jaka wi#diwa. Yi n#mi# kwaasi# di#wija' n#mi#re gaalyabwi yi#wawadesi#. Kiri' aawa. N#mi# naanga nebulya'na di#van#ge. N#mi# sar#mi#ny# yavada#gaidi# taanginya ay#na wi#jaaya'na “Aala!” di#wa'de. Sarevi#daasi# “Sar#mi#nyawi# Koridi#na bi#deinyi#,” di#wa'de kiri' n#mi# yarai wi#wa'deinyi# mi'. <sup>24</sup> Sare kiri#vi# nemi# sar#mi#re li#mwangeburi# di#rag#nna mamarey#h#mwaaly#go. Aawa. Sar#mi#re yi#laayabwi marima'naabya'na nemi# yi#hye'mwannay#h#vaimwadaanyaine. Sare' darev#inyi#. Kiraazi#tyari# di#rag#nna li#mwangeburi# sar#mi# di#rag#nna mena daa'man#gasaih#lyi#.

## 2

<sup>1</sup> Yi n#nnya yune si#munyav#nanya' mena wi'na dara di#wa. N#mi# sar#mi#nyaw#nna sar#mi#ny# munyi' taanga yi#valakya'na ayahi mw#yi# yi#deinyi#. Dena mw#yi#wade. <sup>2</sup> Sare' darev#inyi#. N#mi# sar#mi#ny# munyi' taanginya yi#h#zaav#wija' yi# n#mi#re si#munya' yi#laaya ya'na yi#nga wi'na aaihwai yannelaka! Aawa. Sar#mi#re munyi' taanga mena yi#hivalak#wija' yi# n#mi#re si#munya' yi#laaya ny#ivalya'nera a'mwera pwara mi'. <sup>3</sup> Sar#mi# a'mweihi n#mi#ny# yi#laaya

nyigaibineihilyi. Sarevi sariminyawinna sarimire kayaa'nanya' wanganaawiwiji kwaji sariminyina nimire munyi' taanga kamaa'mudika! "Mi'na kyavada'galapiri wideinyi," dena sariminyawinna wiwa'deinyi mi'. Sahirisavine'na kigaa' paaziya' nimi yihithave. Yi nimi sarimi yuyaihirina diragina dara limwamwa'de. Nimi pininna yilaaya yiwija' yi sarimi yuyaihi yilaaya avaina yadivisaihilyi. <sup>4</sup>Sare' darevinyi. Sagaa' sarimire mwaalyabwina nimire munyi' taanginya naangesi nimire simunya' daanga naangesi kininnakeinyi nabaai kidalaalya kwalaalyangi pikarya yihithave. Paaziya daza! "Sariminyi munyi' yune taanga wivalakima!" majena yihithave'na mi'. Aawa. "Sarimi 'O Polimi neminyina tewaanya naanga wivu'nivanikelyi,' yawirangabika!" dena yihithayesi.

*Pwai gannya yiwetawakya' wiagalya'mavakeri ayina maaresa'nesi.*

<sup>5</sup> A'mwe akwai gamirebwina kya' kale neyadaa'nyi sai yune nimi gaveinyi kale sa' manyivani'. Aawa. Sahwarina kale kibawenna yuyaihiri yihivani'. Nimi "Savina taanginya naanga nujaavwidika!" yagaala dena "Kibawenna," yihithiwe'nanyi. <sup>6</sup> A'mwe dazareri a'mwe kwalaalyaihi mi'na yeve' yi sa' sari wi'nanne' tiviki'mwa'daasasi. <sup>7</sup> Sarevidaasi yi dahaa' sarimi mudika piri' pibwi jila! Yi sahwai gannya kayaa'nanyaburina kale nayaa wiadaa'nyi gamire kayaa'nanya sa' yange'na marasi'napiji sahware simunyavi

kave nayaa jivaimwagila! Munyi' taanga naanga naange' nebulya'na nagalavilawakadika a'mwe dazar! 8 Sarevıdaasi yi nımı yaamiji diraginna dara dıvanıge. Sahwari sarımire kale ya sabwi ayına jıvwarıdaakwila! 9 Sare' dare'nanyi. “Sarımı nımire yagaalya' yuna mıdızaihi daaka?” dena sarımınyı yaamiji yijiwaalya'ne! “Yawırangandı'nanyi,” dena sınnawı pıkarya pıri' a'mwe sarınajı nımı yıdavesi. 10 Yi nabaai sarımı a'mwe sarı wagiıya' marası'nıwa'daasa' yi nımı kwainyi marası'nıweinyi. Sare' darevinyi. Nımı wagiıya marası'nya'ne kınınnakeinyi daakajı yi sa Kıraazıtyare tınyarı gaimwanga yihya'neinyi nımı marası'nıwengi. 11 Nemi nayaa sara yaana! “Saataanı nemınyı kwaası neyojı nanevilawakadika!” dawaajı sara yaana! Sare' darevinyi. Sahware simunya kayaa'nanyabwi mena yawı'daanyaine. Sare'na taanga naanga sarıne nayaa marası'naana!

*Gotiyare nelımwagarıka mudıkevıne wıdaayadıvısaraavınesi.*

12 Pıgaasagaa' anga Tırawaazına Kıraazıtyare yagaala tewaanya' wijiwaakya'neinyi bı'mavena yi Naangei nımınyı tusa' yınıga wı'na wijiwaakya'na kanyıbaasıwa'dı' wijiwaakıwa'de. 13 Kıri' nımire simunya' kave mwariwa'dı'. Nımınyı nya'mwei Taaitazai anga sabanna sarımınyıne yagaala mamakabyakerı tınna mwanganyıwa'de. Aawa. Simunya kwalaalya yawı'dı Tırawaazı



mwaalyaraavi nayaa yagalya'ma'na yena Piroviji Maazathoniyana bena bi'ma'mwa'de.

14 Kiri' saba Taaitazari sariminyine kadika wi'n'iwa'de'na Gotiyari nimi suya wivani'ge. Kiraazitiyai yuya kayaa'nanyangiji yuya kayaa'nanyaraaviji malyavi mena dathiwagakev'idaa'ny' yuyagaa' Gotiyai Kiraazitiyariji yaaraya neyadaa'ny' yilaaya yiwadaanyaine. Yi sahwai gamire yagaalya' nej'waakada yi yuya pimagi wijiwakamaryadaawoji a'mweraavina Kiraazitiyar' wibwar'idaakwadelyi. Yawita daza' sa' wabatirinya' yuneba winigode'bisasi. 15 Sare' dare'nanyi. Kiraazitiyar'ina wijiwakamaryadaanya' wabatirinya' Kiraazitiyar' yima'naabada yi Gotiyaryawinna wawode'bisaine. Nemi wijiwakamaryadaanyagaa' Kiraazitiyai wivadaihasamaa'man'keraaviji pwara kayaaka yigainivanigasaraaviji saraayawinna tirinya' wawodesi. 16 Yi piri' darsi. Sahwara kayaaka yigainivanigasaraavi yi sa' barya'ne tirinyasi. Yi sa' baryabwi sahwaraavi marima'naabathesi. Yi piri' darsi. Pwara wivadaihasamaa'man'keraavi sa' gaalyabwine tirinyasi. Yi sa' sahwaraavi gaalyabwi marima'naabathesi. We! Wawinya daza' gannya diraginyavi yiniga wi'na aihwai yannelaka! 17 Sare kiri' darevinyi. A'mwe kwalaalyara nigwia maa'nya'nera Gotiyare yagaalya' yaasiwa' wijiwaakadiv'tabaai'bitaina mi'. Aawa. Nemi Gotiyare wawinya daza' ma'daa yi nemi yaasiwa' kwaasi yagaala

damaryadaanyaina mi'. Aawa. Nemi gamire yagaala yuya yida'na mi#wodaanyangi. Nemi Kiraazitiyari wlamwaihoina yi Gotiyare tinnyari Gotiyar#ne jalikurakadaa wi#iwaakivanigo.

### 3

<sup>1</sup> Nemi ayahi yamaasa' yadaa yune nemi#ne yaya'na munyaba dahamakimanigo! A'mwe pwara paaziya' kumi#ne yaya' makilya'ne' limwamanigatabaai#i' a'mwera paaziya sabisa' nemi#nyine' yihidavesa' negaininikeina dingaka! Sarimi# sasare pikarya nemi#nyine' nayaa jithavide' negaininikeina dingaka! <sup>2</sup> Paaziya nemi#ne yayavi# munyaba makilya'ne sa' yi sarimi# sawhai#lyira. Yi paaziya dazavire pikarya sa' yi nemi#re simunyavi# wilar#!. Yi dara yawi#dinyainyi. Sarimi# yivanigasabwi paaziya#bisabwina dara din#! "Pol# Gotiyare wawinya' nayaa yadelyira." A'mwe yuyara paaziya daza' yawirangadivi# yi sawwara dangadivisaihiyi.

<sup>3</sup> Sariminyawi nemi# nayaa yihithaayo saihi Kiraazitiyai pikarya yidavakeihi ku'maayaba marima'naabahesasi. Yi paaziya daza' sawwai yigiyasi# yidavaka' mi'. Aawa. Gotiyai gaalya' kininnakere Kuryalyi# sawwai pikarya yidavakesi. Sawwai sipadasikaari# Gotiyai yidayaakabaai#i' pwaipwairiramaaraka yidavaka' mi'. Aawa. Gannya yikwia' kilaakejikiya simunyangi# yidavakesi. Yi sarimi#re simunyangi# yidavakesi.

<sup>4</sup> Aaya kaavila dazavire yagaalya' yi daresi. Kiraazitiyai negaimwagya'nei gannya

d#rag#nya' nejaavan#'. Sare'na l#ka mi yadaa Got#yari# nebulya'na limwadaa sara nayaa yoinera. Nemire simunya d#rag#nya' sasarev#daa'ny#ny#'. <sup>5</sup> Nebulyas#. Yune nemi# sainana y#n#ga wi'na yaanneina m#'. Sarev# y# "Yune nemi# sainaav#daa'ny# naw#l'nya p#n# marima'naabadeinera!" madaanna! Aawa. Got#yai gave pwainanyai sahwai nem#ny#ne y#n#ga wi'na yaanne' wakadely#. <sup>6</sup> Y# nemi# Got#yare yagaala nel#mwagar#ka mud#kevi#w#dayadaanyaina y#n#ga wi'na yaanneinaav# nayaa ney#mav#mwaaihadely# sahwai. Yagaala nel#mwagar#ka daza' K#w#nyav#ne p#karya y#da'n#ka sa'l#bita' m#'. Aawa. Sa' yune Kurya Tewaanya sareng#. Sare' darev#ny#. K#w#nyav#re p#karya a'mweraav# dara wibwar#daakwades#. Galazek#vaimwaana! D#vaideig#ny#. K#r#l' Kurya Tewaanyai yagaala tewaanyav#na a'mweraav#na gaalyabwi w#jaavadely#.

*Got#yare yagaala nel#mwagar#ka mud#kevi#re byaanna d#rag#nyav#nes#.*

<sup>7</sup> Y# K#w#nya dazav#ne' Got#yai s#lyari# y#dayaake' y# dazav#re waw#nya' baryabwi marima'naabakebuly#. Nabaai waw#nya daza' Got#yare byaanna d#rag#nya k#r#s# y#ma'nakes#. Sarev#daa'ny# Ne Moz#zare sinny#l' byaanna d#rag#nya' wannakiki. Y#z#rel#yara byaanna d#rag#nya dazav#na sahware sinny#k# y#n#ga wi'na baihanareta' m#'. Byaanna d#rag#nya daza' maal#ka wanny#na yaka d#vi y#wawaka, k#r#l' y#n#ga wi'na baihanareta' m#'. <sup>8</sup> Y# k#gaa' waw#nya sare' byaanna d#rag#nya' k#n#nnakes#.

Yi Gotiyai Kurya Tewaanyari a'mweraavina wijaaya'ne wawinya' yi sa' dazavi wavila'da Gotiyare byaanna diraginya' naanga naanga maa'de' daaka! <sup>9</sup> Sare' darevinyi. Kiwinya dazavire wawinya' diraginna nejida'daa'nyi nemi dina “Kayaa'nanyabwina nemi baryabwi maranneinera.” Yi sare' kiri' Gotiyare byaanna diraginya' kininnakesi. Sarevadaa'nyi yagaala mudika dazavire wawinya' dade' “Kurya Tewaanyarina sahwaraya yida'maraangerera,” yi daza' Gotiyare byaanna diraginya' naange' kininnake' wawinya' pirivi' naanna wavila'desi. <sup>10</sup> Sare' darevinyi. Yi Kiwinyavire wawinya' byaanna diraginya' maryaakesi. Yi sare' dahaa' kunesira. Wawinya' mudika daza' yi savi yune diraginna wavila'da nemi yawi'daanyi. Yagaala mudikevire byaanna diraginya' yune naange' warikevadaa'nyi Kiwinyavire' mwarika! <sup>11</sup> Sare' darevinyi. Kiwinyavi' wawinya' daza' Gotiyare byaanna diraginyasi' yima'nake' mena yiwia'nesi. Kiri' Kuryarane wawinya' daza' Gotiyare byaanna diraginya' kininnake' yuyagaa' waragwothesi. Sare'na sahir'i' ayavi yune naanga naanga wavila'desi.

<sup>12</sup> Sarevadaa'nyi yagaala sare' kininnakeina “Byaanna sa' waragode'nana,” diraginna limwadaa nemi lika mi yadaa ku'maayaba yagaala sa' nayaa yida'na jalikurakadaanyaine.

<sup>13</sup> Nemi Mozzaibi' yadaanyaina mi'. Sahwai gannya sinnyiki kwaabihannyabaalyi kawaaka yirakinakelyi. Yi byaanna diraginya' daza' maalina yiwina yaka yinahu naanga yuya' yiwina yaake'na “Yizireliyara sa'

tinna nanyangabi ika! |” daka kawaaka  
 yiraki nakelyi. <sup>14</sup> Yi Mozizare wawinya'  
 sahwaraya nayaa myawiri. Aawa. Kumire  
 simunya nebulya'na bipale'na yakengi.  
 Sare' darevinyi. Yuyagaa' sahwaraya Gotiyare  
 yagaala wili mwagaraka ayavire yagaalya'  
 dangadivi' yi yagaala savi kwaabihannya  
 daza' kuna wari'. Yi dahaakigaasi kuna  
 mu'nyadiviki. Sahwaraya kwaabihannya  
 sa' mamarasi'nyasi. Yi Kiraazitiyai gave  
 pwainanyari' sahwarina Gotiyai daza'  
 marasi'delyi. <sup>15</sup> Aawa. Gazagaasagaa'  
 sahwaraya Mozizare yagaalya' dangadivi'  
 kwaabihannyabaai kumire simunyangi  
 bwakali mwagarai'. Sahwaraya myawiryadiviki.  
 Yi dahaakigaasi kunanyi. <sup>16</sup> Kiri' gazagaasagaa'  
 pwai kwai Naangeryawinna kaginyiwagozi  
 yi sahwarai simunyavi' kwaabihannya daza'  
 marasi'nadelyi. <sup>17</sup> Yi Naangei sai Kuryalyira.  
 Nabaai Naangere Kuryai a'mwe pwarai mwaali'.  
 Yi aawa, yuya pini yagaala wiji mwagaraka  
 ayavi a'mwe sahwarai wila yirakivanikai mi'.  
 Aawa. Sai sahibanna tewaanna mwaali'.  
<sup>18</sup> Yi nemi yuyaina nemire sinnyikaavi lika  
 yulyakya'ne maayaina mwai hoinera. A'mwera  
 sinimwavananya yennadivitabaai' nemi  
 Naangere byaanna diraginya' wangadaa  
 Naangere a'mabaalyaina yima'nivanigo. Yi  
 Naanga sahwai, Kuryai gannya byaanna  
 diraginya daza' nayaa marima'naabya  
 neyadaa'nyi yuyagaa' nemi byaanna diraginya'  
 naanga naanga ma'daanyaine. Yi Naangere  
 a'mabaalyaina kuna yima'nadaanyaine.

## 4

<sup>1</sup> Sarev# Gotiyai kale'na negaimwagakabaaib# waw#nya nawi'nya daza' w#dayadaanyainaav#na nejaavakesi. Sav# y# nemi waw#nya daza'na diraginna dadaa maa'na ney#deina mi'. <sup>2</sup> Aawa. Nemi wag#la kin#nnakebwi lika yulyar#kebur# bule'nanya' mena w#javadaanyaine. Nemi kwaasiya sabur# yamaryadaanyaina mi'. Sara myadaa y# nemi Gotiyare yagaalya' marav#la'nya yadaanyaina mi'. Aawa. Nemi Gotiyari# tinnyari# yagaala nebulya'nanya' ku'maayabanna marima'naabya yadaanya' y# a'mweraav#re simunya gazar#zar# dara y#bwak#div#sasi. Y# apozeliyara sareraav#ne yaya' munyaba mak#laana! <sup>3</sup> Kiri' nemi yagaala tewaanya daza' w#j#wakadaanya sav# kawaaka y#rak#naja' y# sa' a'mwe saba sana y#w#na ya'neraav#na kawaaka y#rak#van#kesi. <sup>4</sup> Y# dathahaasaraav#re gotiyai Saataani# a'mwe sahvara Kiraazitiyar# mal#mwagyad#v#ita dazaraav#re simunyang# gid#raval#mwagata yadely#. Y# yagaala tewaanyav#ne' Kiraazitiyare byaanna diraginyav#re baake' kum#re simunyang# y#n#ga wi'na wannade' mi'. Y# sarev# tih#ral#mwagata yadely#. Y# sahvara Kiraazitiyar# tinna mwanganyad#v#saly#. Y# sai Gotiyare a'mabaala nebulya'nanyaly#. <sup>5</sup> Sare' darev#ny#. Nemi yagaalya' yune neminy#ne' w#j#wakadaanyaina mi'. Aawa. Nemi yagaalya' dara jal#kurakadaanyaine. Kiraazitiyai Jizaazai sai Naangely#. Y# Jizaazar#na nemi sar#m#re y#h#thayadaanyainera. <sup>6</sup> Sare' dare'nany#. Sinnaw# Gotiyai mena jaakely#

“Jihinyavidaasi baake' mwadana!” Yi Gotiyai sarei gamire baake' neminyine simunyangi banemwadakesi. Gotiyare byaanna diraginiya' Kiraazitiyare sinnyiki warike' nemi yawiranganya'neinaavina baaka sa' banemwadakesi.

<sup>7</sup> Nabaai kiri' nawinya daza' kininnakeina, kwadika yaasiwa'nanyaraavi Gotiyai nawinya daza' maradingikakabaaibisaine. Gotiyai “A'mwe yuyara diraginiya nawinyaange' yawirangabika!” kada' dara yima'nakesi. Diraginiya naanga daza' yune nawinya' yi sa' Gotiyare diraginyasi. Sa' yi nemire' mi'. <sup>8</sup> Yi nemire wawinya' yadaa yuyanna neminyi taange' neyima'nadeine. Sare kiri' sa' kayaaka nebulya'na neyigalakadeina mi'. Yawita kwalaalya nemire simunyangi nerihiralimwaga'dengi. Sare kiri' nemire simunya yunebanna yiwya yada mi'. <sup>9</sup> A'mwera “Sahwaraavi kayaaka yigalaana!” dadivi' nega'mijamakwodivisaine. Sara neyadaapiri kiri' Gotiyai neminyi neyagalya'ma'dei mi'. Sahwara neminyi mala neradaapiri wala'daanyaine. Sare kiri' Gotiyai negaimwadaa'nyi nemi kayaaka nebulya'na yidaanyaina mi'. <sup>10</sup> Yuyagaa' nennya kilaakejikaavi Jizaazare baryabwi ma'daanyaine. Yadaa kaanya yamaryadaanyaine. Gotiyai neminyina “Jizaazare gaala sabwi kibulyi kumire kilaakejikaavi ku'maayabanna yima'naabana!” kada' sareina kaanya yamaryadaanyaine. <sup>11</sup> Sare' darevinyi. Yuyagaa' gaala mwaidaanyainaavi Jizaazarina a'mwera a'mwatamakya saza baryaburi

nemariṁwangadivisaine. Gotiyai neminyina “Jizaazare gaala kibwi yi kumire kilaakeji' balya'nejiki ku'maayaba marima'naabana!” kada' nemariṁwangadivisaine. <sup>12</sup> Sarevi barya sabwi neminyi neyadesi. Kiri' Gotiyai gaalyabwina sariminyi yihyadevulyi.

<sup>13</sup> Neminyina Kuryai diraginna limwangebwi nejaavakeine. Yi sasare dazabwi Gotiyare bukuya' yida'nikabaaibisari avaina wijayaakesi. Yi dara din' “Nimi Gotiyari diraginna mena limwagevi yi yagaalya' wideinyi.” Limwanga avaalabwi maaroina kwainaji diraginna limwadaanyavi yagaalya' widadaanyaine. <sup>14</sup> Yi nemi mena diraginna yawi'manigo. Gotiyai Naanga Jizaazari yidikaavakei yi sahwai nemi Jizaazalyiya kwainaavi neyidikaavadelyi. Yi neminyiji sariminyiji sainaavi nemakwawoji gaminyaba gid'husaba nemwaahadelyi. <sup>15</sup> Sare' darevinyi. Yuya daza sariminyi gaimwagya'ne neyima'nivanikengi. Gotiyai “Nimire yanga gaimwangebwi a'mwe kwalaalya naanga naangeraavi yunebanna w'warana!” kada' sara neyima'nivanikengi. Yi yuya sahwara Gotiyari suya naanga naange yipi'de'nanyi. Sara yadivi' gaminyine yaya' munyabanna makibi'dere.

<sup>16</sup> Dazahirivi yi nemi Gotiyare yagaalya' diraginna dadaa maa'na neyideina mi'. Aawa. Nemire kilaakeji' kayaaka kuna yade kiri' yuya yirika sariki yuyagaa' nemire kuryai mudikei diraginyai yima'nadelyi. <sup>17</sup> Yi daresti. Gotiyarina nemi dara yawi'daanyi. Taanga neminyi neyima'nade daza' wana maalikesi.



Yi sa' wana kibawe maalikéгаа' waradesi. Nabaai taanga wana maalika sa' divi sagaa' neminyine wana nawi'nya' byaanna diraginya naange' kininnake' marima'naabathesi. Nabaai wana nawi'nya' taanginya maalitaaya savi yuna wavila'de' yi yuyagaa' yuyagaa'nesi. <sup>18</sup> Yi nemi Kwaaka davakiyangi taanginyangiji tinnyalyi wangadaanyangi diraginna myaw+ranganyadaanyaine. Aawa. Sigunyav+yangi tinnyalyi mwanganyadaanyangi diraginna yaw+rangadaanyaine. Sare' darevinyi. Yuya nemi tinnyalyi wangadaanya sa yune maalikéгаа'na waradengi. Yi daza tinnyalyi mwanganyadaanya sa, sa yuyagaa' yuyagaa' waradengi. Sara yawi'daa diraginna dadaa maa'na neyideina mi'.

## 5

<sup>1</sup> Sare' darevinyi. Nemi Apozeliyaina mena dara yawi'manigo. Kwaaka davakiya kilaakeji' siminangebita savi wlamwaaiho. Nabaai sa' wo'dalasi'na yinaja' yi nemi ange' piri' kininnakeine. Yi sa' Gotiyai nejaavadesi. Anga daza' a'mwera asaji mannika'na mi'. Sa' Sigunyavi warike'na yada yuyagaa' yuyagaa' waragwothe'na. <sup>2</sup> Sare' darevinyi. Dahaa' nemi anga davi simuyiwaala yawi'mwaainivanigo. Nemi tewaanya diraginna dara nevu'nivanike'nanyi. Nemi anga daza' Sigunyavi warika daza'na sara wa'da nemi ne kilaakejiki baazi'ma'nya'bi' bwakalimwagata neya'ne'na simuyiwaala yawi'mwaainivanigo. <sup>3</sup> Nebulyasi. Divi anga daza' Gotiyai tivi'na

bwakalimwagata neyaja' nemire kuryara kunera yaasiwa'na mwaabinera mi'. <sup>4</sup> Sare' dare'nanyi. Nebulyasi. Nemi siminanga dazavi kuna mwaaihoina Sigunyaviyavina taanginya yibwakidaa simuyiwaala yawi'mwaainivanigo. "Nemi kilaaka sinnawinyaji' yagalya'mavaana!" myawirivanigo. Aawa. Sa' maalikesi. Nemi "Kilaaka gaala nebulya'nanya dazaji' kilaaka barya ya'ne dazajiki' naanga naanga galawilawakana!" dawaaji baazi'ma'nya mudike'bi' baazi'ma'naade'nanyi. Yi sare' naangesi. <sup>5</sup> Gotiyai gami sai neminyi gaala dazahiri' maarya'neinaavi mena neyoviravamwaihakelyi. Yi sahwai Kurya Tewaanyari' mena nejaavakelyi. Kurya Tewaanya sai divi Gotiyai yuya nejaaya'ne pimaginiya aaya mudi'nanya sa'bisalyi. Yi Gotiyai sahwari' mena nejaavake'na nemi dara yawi'manigo. Naanga nebulyasi. Sahwai gamire yuya nayaa nejaavadelyi.

<sup>6</sup> Sarevidaa'nyi yi nemire kilaaka mudikeji' nejaavade daza' yuyagaa' nemire simunya' diraginiya neyivaimwadesi. Nemi dara yawi'manigo. Dahaa' nemire kilaakeji' ange'bisavi mwaaiho'na Naangeri yibwa'nona sahwalyi gamire angeba mye'mwannamwaalyigo. <sup>7</sup> Sare' darevinyi. Dahaa' nemi gaminyi limwaga'daa yamarivanigo. Nemi sahwari' tinna mwanganyadaa yamarivanigo. <sup>8</sup> Yi nemi diraginiya neyivaimwannikeine. Sara tivi'na diwo. Nabaai neminyi tewaanya dara nevu'nivan' "Kilaaka dathazikidaasi yibwa'nawaaji

Naangeryawinna gamire angebanna sahwalyi tewaanna ye'mwannamwalaade'nanyi. Yi sa' tewaanyasi.”<sup>9</sup> Sarevi nemi simunya diraginna yawi'daanyaine. Yi nabaai nemi sahwalyi ye'mwannemwalaaja' yi nemire anga nebulya'nanyavi yibwa'naaja' Naangerina yuya sabura ya'na sahwari yilaaya wigalaade' naangesira.<sup>10</sup> Sare' darevinyi. Kiraazitiyai yawibwarya'ne namwaalyisavi nemi yuyaina ku'maayabanna nayaa yima'nabaatheine. Yi nabaai nemijiya gazaizarina Gotiyai “Tewaanyabwina yadei yi sai kilaakejiki wilamwaaida yakebwina tivikita nawi'nya maarana! Nabaai pwai sagaa' kayaa'nanyabwi yadei yi gannyabwina tivikita kayaa'nanya maarana!” kadozi sahba davaadeine.

*Apozeliyara Kiraazitiyai Gotiyariji  
avaaizimunya'na neye'mwagakeburi  
widaayadivisavines.*

<sup>11</sup> Sarevidaa'nyi Naangere diraginyavina lika yabwi yawi'daa a'mweraavire simunya dihaa'bwata yadaanyaine. Yi Kiraazitiyari diraginna limwabi'de'na widadaanyaine. Kiri' Gotiyare tinnyari nemire tewaanyabwi ku'maayabanna mena yima'naaba'. Yi nabaai nimi dara limwamanige. Sarimi kwaihire simunyara padaihirakyaraavi sabwi ku'maayabanna yima'naabake' dingaka?<sup>12</sup> Yagaala dazavi sarimi neminyina “A'mwe nawi'nyarera,” dineyawiryide'na mihizivanigo. Aawa. Yi daza' sarimi neminne yaya' munyaba makilya'neihire

tusa' baasivanigo. Kir'i' sarimi' sahirina mi'. A'mwe pwaraavinyi. Yi' sahwaru yune kunnya sinna mwasimaginyavina kumire yaya' munyaba yaaswa' makinadivisare. Sahwara simunyavina yaya' munyaba nayaa mamakinyadivisaraavinyi. Yi' sahwarav'i yiniga wi'na wirivikipine'nanyi. <sup>13</sup> Sare' darevinyi. Pwara neminyina dara yawipija' "Sahwara siduta maaya nav'navikera sara yivaniga'," kir'i' nemi' Gotiyar'ine'na yadaanyaine. Kir'i' nemi' simunya yida'na yawi'daa nemi' sariminyi' gaimwange'na yivanigo. <sup>14</sup> Sare' darevinyi. Kale Kirazitiyare yune sa'na wawinyavi neyidikaabwa'desi. Yi' nemi' mena dara yawibwa'manigo. Pwai kuminyineba yunebanna wivadaihasamaarya'nei mena balina yakev'daa'nyi' yi' dazavi' kumi' yuyara mena bainikerabisare. <sup>15</sup> Gotiyai' "A'mwe gaala mwaaihata sara yune kumi' saraavina yawi'divi' mamwaaibina! Aawa. Yune sahwai kuminyine'na mena balakeri' ayina yidikaavei yune sahwari'na yawi'divi' gaminyi' yadivisa'na mwaai'ka!" kada' yuyaraavine'na mena balina yakelyi.

<sup>16</sup> Sarevi' sagaa'daasi nemi' kilaakebulyiya simunya savire saburina a'mwe aane pwari' kwari' mamaryawibwarivanigo. Nebulyasi. Sinnawi' nemi' simunya savire saburina Kirazitiyari' sara maryawibwaroina dingaka? Kir'i' dahaa' sahwari' nemi' sasara kuna mamarayawibwarivanigo. Aawa. Gamire nawinyabwina nayaa

yawirangamanigo. <sup>17</sup> Sarevi yi nabaai a'mwe kwai Kiraazitiyari wlamwaalajai yi Gotiyai a'mwe sahwari yuna mudika tewaanyari mena wimwaaihadelyi. Gaminyina sinnawinya ayabwi yuya yiwya yadengi. Yithaanyi! Gaminyina yuya mudikebwi mena yima'naabadengi. <sup>18</sup> Yuya dazangi aaya kaavilyai Gotiyalyi. Yi sahwai Kiraazitiyarina kigaa' yikamaangeina mwaaloinaji gamiji avaaizimunya'na neye'mwannamwaaihakelyi. Yi nabaai sahwari gaimwagya'ne' gamire yikamaangeraavi sahwariji avaaizimunya'na ye'mwannayima'nya'ne wawinya' mena ne-jaavakelyi. <sup>19</sup> Nemire yagaalya' daresi. Gotiyai a'mwe Kwaaka davakiyara yikamaangeraavine yuya yiwetawakya yikamaangeraji avaaizimunya'na ye'mwannayima'nakesi. Yi Kiraazitiyari sahwai yuya yiwetawakya sahwara yeta sanna simunya ayahi yawirakai mi'. Yaka sai neminyi gamire yagaala daza' wijjwaakya'ne', yikamaanga sara gamiji avaaizimunya'na ye'mwannayima'nya'ne' newakakesi. <sup>20</sup> Sarevidaa'nyi yi nemi Kiraazitiyare maangi' ma'daa sahwarineba a'mweraavi wijjwakawadaanyaine. Yi dare'. Gotiyai gami sai a'mwe yuyaraavi nemire maangisi wijjvwaramaa'mani'. Kiraazitiyai gami sarine'na sahwaraavi dara yidangadaanyi. Akai, sarimi Gotiyarina yikamaanga sabwi yagalya'mavapi Gotiyalyi avaaizimunya'na yima'napiji je'mwannamwaalyila! <sup>21</sup> Sare' darevinyi. Kiraazitiyai kayaa'nanyabwi maayai kiri' Gotiyai yuya kayaa'nanya nemire sa

mari'bwaraka yune sarina munyaba yilakaka yi sahwari kayaa'a'mwe nebulya'nanyari wimwaaihakelyi. Neminyina Gotiyai "Kiraazitiyar wilaamwaalya'nera nimir yida'maraangebwi kininnakera yima'nipika!" daka neminyineba sara wimwaaihakelyi.

## 6

<sup>1</sup> Nemi Gotiyalyi wawinya ye'mwannayadaanyaina sariminyi diraginna dara yithithivanigo. Gotiyare yanga gaimwangebwi mena daape'. Akai, gaimwanga sa' sarimi yaaswa' saba sana yagalya'ma'na nyipidika! <sup>2</sup> Sare' darevinyi. Gotiyai jaa'. Dara dini'

"Nimir nawi'nyagaa' kadika gu'neinyi.

Yirika wivadaihasamaasa'neriki gihaimwageinyi."

Nimi yithithivanige. Yithaanyi! Dathahaasagaa' gami nawi'nyangeaaki. Yithaanyi! Dahaa' yirika wivadaihasamaarya'neriki.

<sup>3</sup> Yi a'mweraavire sivilyangi kurinoji sahwara walarya'ne nemi kayaa'nanya aane piri' kiri' yadaanyaina mi'. "Nemi kayaa'na yaaja' a'mwera tinna wanganapiji nemi Gotiyare yagaalya' wijiwakadaanya wawinya dazavina sahwara yagaala kayaa'nanya' nadipidika!" dona kayaa'nanya aane piri' kiri' yadaanyaina mi'. <sup>4</sup> Aawa.

Yuyangi Gotiyare widaayadivisara nayaa yadivitabaabi' nemi yuyaraavina Gotiyare yagaalya' widadanyavina tewaanyabwi wibwaridakwadaanyaine. Yi yuyangi dara

yadaanyaine. Kwalaalyagaa' kayaa'nanyangi diraginnna nebulya'na da'daanyi. Yi taanga neyima'nadaasi, yi taanginya neyima'nada, yi kayaaka yinigirasaina mwaidaanyi.

<sup>5</sup> A'mwera neminyi malyaji neradivi' kalavuza neyrakadivisaine. Yikamaangera nega'mijamakwodivi' jaka kayaa'nanya nedadivisaine. Nemi yagiyagi wawinyavi nebulya'na marulawakidaanyaine. Sawita kwalaalyangi se mwaryadaanyaine. Nemi miji'na mwaidaanyaine. Sarevidaa'nyi pwara dara yawiranganya'nanyi "Taanginya wiadaa'nyi kiri' Gotiyare wawinya' kuna yadivita sahwaru Gotiyare widaayadivita nebulya'nanyarera." <sup>6</sup> Nemi tewaanya yida'nanyabwina yadaanyaine. Yadaanyagaa' yawita nawi'nyabwi limwaga'daa mayagaala yarai dadaanyaina mi'. Nemi a'mweraavi tewaanya nawi'nya pada'galayadaanyaine. Nemi Kurya Tewaanyare yange kininnakeine. A'mwe Kiraazitiyareraavina tewaanya nevu'nya sabwi yune maangi'nanya'na mi'. <sup>7</sup> Nemi yagaala nebulya'nanya' wijiwakadaanyaine. Nemi Gotiyare diraginyavi gamire wawinya' yadaanyaine. Sareinaavina pwara nayaa dara yawipine'na "O, sahwaru Gotiyare widaayadivita tewaanyara daaka!" yi nemi sara yadaanyaine. Nabaai tewaanya yida'maraangebwi limwaga'daa, aangasiri' kwaari'masiraminya' wa'da kwanaamiri' saabya' wa'devaai' kayaa'nanyabulyi nemi mala tannadaanyaine. <sup>8</sup> Neminnye wawinya'na a'mwe pwara neminne yaya munyaba

makidivisaine. Yi pwara neminne yaya kwaakewi marulawakadivisaine. Neminyina pwara yagaala kayaa'nanyaji bulayagaalyaji dadivisaine. Yi pwara a'mwe pwaraavi neminyina widadivisaine "Sahwara wawinya' tewaanya yadivisarera." Apozeliyaina Gotiyare wawinya' kuna nayaa yadaanyaine. Yi a'mwe pwara neminyina yagaala ge dipija' nayaa yadaanyaine. Pwara neminyina dara yawi'divisaine "A'mwe sara kwaasi yagaala dadivisare." Kiri' aawa. Nemi yagaalya' nebulya'na dadaanyaine. <sup>9</sup> Pwara neyawirangadivitaina mi'. Kiri' a'mwe kwalaalyara neyawiranganamaa'divisaine. Nemi baidaa kiri', yithaanyi, nemi gaala kuna mwaiho. Gotiyai neminyi yavada'gala ya'nei tamamwaihaderabisaine. Kiri' sahwai yuna maneramakyadeine. <sup>10</sup> Nemi kale neyivan'. Kiri' yuyagaa' nemi yilaaya yadaanyaine. A'mwe gilyivita maayainabi' mwaidanyaine. Kiri' nawinya kininnakeina nebulya'nanya a'mwe kwalaalyaraavina wjavadaanyaine. Nemi gilyivita aane pimili' kimili' kininnakeina mi'. Kiri' yuya nawinya gazaza limwagakoine. Yi yuya sanna yadaa dara wibwaridaakwivanigo. Sahwaina Gotiyare widayadaanya nebulya'nanyaine.

<sup>11</sup> Sarimi Koridi mwaalyaihi, nemi sariminyi yagaalya' ku'maayaba jalikurakya'neina maanga naangeva'na tavadiwo. Nemi sariminyi maarya'neba nemire kale naanga yima'nwa'. <sup>12</sup> Nemi simunya' sariminyina tihirakamaremwaala miwo. Aawa.



Neminyi sariminyina tewaanya nevu'nivani'. Kiri' sarimi saihi sarinnya simunya tihirakamaremwaaiha'. Yi nemiji avaaizimunya nebulya'na mamwaalyiga'. <sup>13</sup> Ganimaangei gannya kaimiraayangwi widadevaai' dahaa' yithithivanige. Nemire dazabwina ayina tivikiryane' neminyi maarya'neba sarimi kwaihiyi sarimire kale naanga yima'nana!

<sup>14</sup> Mu'nyadivisara sahwaraya yipwarabisare. Sarimi kumirebwina mye'mwannayamaripina! Yadivi' kunnya sahwaravire saburi gainwanga mipina! Sare' drevinyi. Yida'maraanga sabulyi kiwinyavi galazekivala sabulyi sawaai gatha'dara ye'mwannayikadewaalaka! Baakesi jihinyasi gatha'dara ye'mwannayirakurikadewaalaka!

<sup>15</sup> Nabaai Kiraaizitiyai Kamaalyalyi avaaizimunya'na ye'mwannadatheidi ngaka! A'mwe Kiraaizitiyaridi raginna limwadelyi Kiraaizitiyaridi malimwagyadelyi saraai simunya gave pirina limwagikaderaai daa!

<sup>16</sup> Gotiyare anga tewaanyasi kwaasigotiyaraji marirakurakipi'de' daaka! Sare' drevinyi. Nemi Kiraaizitiyareina Gotiyai gaala kininnakere anga tewaanyasira. Gotiyai jaakabaaibisasi. Yi dara din'

“Nimi sahwaravidi wilaamwaalideinyi.

Sahwarayaba kaanya yamarideinyi.

Kumire Gotiyainiyi mwaalideinyi

Niminyine a'mwera mwaabi'dere.”

<sup>17</sup> Sarevi Naangei ayahi pirisi jaa'

“Pwaraavi tinnyaba nayaa jahalya'mayila!

Sahwaravidi menyawidi sarimidi dimwaalyila!

Girikita'nanya aane pir'i' kir'i' malimwabina!  
Nimi sainyi sariminyi yihimaardeinyi.”

18 “ Nimi sariminyi Sirinimaangeinyi  
mwaalideinyi.

Sarimi nyigwaalaangeihilyi nyiraavaangengihilyi  
dimwaalyideihilyi!”

Naangei diraginya yuya kininnakei sasara  
dadelyi.”

## 7

1 Sariminyina tewaanya nyivu'nadeihi,  
yuya daza, Gotiyare yune naanga nebulya'na  
wija daza mena kininnakeine. Sarev'idaa'nyi  
yi nemi yuya girikita'nanya kilaakejikiyaji  
kuryariyaji duimwagasi'naana! Sara yawaaji  
tewaanya yida'maraangeina mwalaana! Sare'  
nemi Gotiyare diraginyavina lika yadaa  
nawinya giri'maayabwi yuyagaa' yunebanna  
neyima'nade'nanyi.

2 Sarimire simunyai neminyineba  
dinebasamarimwaaihila! Nemi sarimijiya  
a'mwe aane pwar'i kwari yiwetawakya pir'i'  
myadaanyaine. Nemi aane pwai kwari  
kayaaka migalakyadaanyaine. Nemi aane  
pwai kwari kwaasi widadaa gamire gilyivisa  
mamwagi'nyadaanyaine.

3 Nimi sariminyi  
yaasiwa' yagaala yihizidaya'ne' majivanige.  
Sare' darevinyi. Nimi mena dara diwa. Nemire  
simunyavi sarimi wlamwaaiha'. Sarevi  
yihigaimwagya'neina sarimi kabalapi nemi  
sarimiji ye'mwannabaina yaade' tewaanyasi.  
Yi nabaai sarimi gaala kuna kamwaalapi  
nemi sarimiji gaala ye'mwannamwaaina

yaade' tewaanyasi. <sup>4</sup> Nimi sariminyina yilaaya yadi diraginna yawi'di ku'maayaba yihizalukurakyivanige. Nimi sariminyina wi'na sariminyine yaya' munyaba makimanige. Yuya taanginya neyima'nade sangi sarimi yiwa'daasa'na nimire kuryari yunebanna nyivaimwamani'. Nabaai yilaaya naange' niminyi yuneba yeku'nawiresi'mani'.

<sup>5</sup> Taanginya sare' darevinyi. Sinnawi Piroviji Maazathoniyana bi'ma'mwa'dohaa' dazimagi kimagiji nemire kilaakejiki kwaamu'na mamwaalyiwa'do. Aawa. Taanginya dala pininna pininnanya neyima'niwa'dikengi. Yi mwasimagi neminyi maiyagaalyaji maangeji warina. Yi kusimagi nemi lika yina. <sup>6</sup> Sare' kiri' taanginya kininnakeraavi yivaimwadei Gotiyai neminyi neyivaimwamwa'. Yi sai Taaitazari maryasaabakei neminyabanna bi'ma'mwakevi sai nemire simunyavi neyivaimwamwa'. <sup>7</sup> Taaitazai neminyabanna bi'ma'mwake'na yune dazahirivina Gotiyai neyivaimwamwake' mi yiwa'. Aawa. Sarimi Taaitazare simunyavi yivaimwanna kiwa'daa' sahwai yagaala datha' makabiwakevi Gotiyai nemi kwainaavire simunyavi neyivaimwamwa'. Taaitazai dara nediwa'. Sarimi niminyi tina wanganya'na tewaanya yihivu'nada yi sarimire simunya' kinna divani'. Sara yadivi' nimiji avaaizimunya'na ye'mwannamwaalya'na sarimi simunya kwalaalya yawi'maniga'. Sarevidaa'ny'i nimi yilaaya naanga naanga yivanige. <sup>8</sup> Sare' dare'nanyi. Nimire pikariyikwiavi yagaala diraginya' sarimire kale

yihigaimwa'dika kiri' yi nimi yagaala dazavina nimir simunya' taanga manyivani'. Nebulyasi. Kigaa' sagaa' simunya' taanga nyakeinyi. Kiri' dahaa' aawa. Nimi dara yawirangamanige. Paaziya daza' sariminyi simunya' kale yihigaimwa'dikesi. Kiri' nabaai sa' maalikagea'nesi. <sup>9</sup>Dahaa' nimi yilaaya yivanige. Sarimire simunyavi kale yihigaimwa'de'na yilaaya mivanige. Aawa. Simunya' kale yihigaimwa'de' sarimire simunyavi mudikebwi yawiramaa'mwa'daasa'nanyi. Sare' darevinyi. Sariminyi simunyavi kale daza' Gotiyai marayihima'niwa'daavadikesi. “Nemire paaziya'ya yagaalya' Koridi mwaalyaraavi kayaaka aane pimili' kimili' nyigalakadika!” kado Gotiyai sara y'wa'dikesi. <sup>10</sup>Sare' darevinyi. Kale daza' Gotiyai marima'naabade daza' yi nem' a'mweinaavi simunya mudikebwi neyadesi. Yi sasare dazaburi Gotiyai neminyi nevadaihasamaa'delyi. Sarevi simunya mudikebwina nemire simunyavi taanga maneyanna! Kiri' kale wiabwi yaasiwa'nanyabwi a'mwe Kwaakevakiyaraavirebwi yi daza' baryabwi gavebwi marima'naabadesi. <sup>11</sup>Sare' darevinyi. Yithaanyi, Gotiyare kale daza' yi dazahirisa' sariminyi dala pininna pininnanya tewaanya nawi'nyabura yihimarima'niwa'daavadikesi. Yavada'galya'na sariminyi mwolavalimwagata yih'hiwa'dikesi. Yi yagaainakeihi sarimire yagaalya yavada'gaimwa'daasange! Yi Gotiyai yihid'kaa'bwa'de' yi sarimire yiwetawakya'na wagila maa'mwa'daasave! Yi Gotiyare

diraginyavina lika naanga yiwa'daasave! Neminyi tinna wanganya'na sarimire simunya' simuyiwaala yiwa'dikeve! Yi tewaanya'na diraginna yadivi' kayaa'nanya'na diraginna nayaa yiwa'daasave! A'mwe dazai yiwetawakya'na tivikita naange' yiwa'daasave! Yuya sangi sarimire sabwi gamire yiwetawakya savina ku'maayaba dara yima'nivan!' "Sarimi yiwetawakya' maayaihiyi."

<sup>12</sup> Sarevi, sinnawi sariminyi paaziya' yidave' daza', yi a'mwe dazai yiwetawakya mena yaka gave sarina yawirena yidave' mi'. Nabaai sahwai a'mwe pwar' kayaa'nanyabwi yingakakerina gaverina yawireinyi mi'. Aawa. Nimi sarimire simunya diraginyabwi ku'maayabanna marima'naabya'na yidavesi. Yi Gotiyare tinnyari sarimi tewaanya nawi'nyabura neya'neihi neminyina tewaanya yihivu'nivanike'nanyi. Sarimi sara yawiramaata'ne' yidave'nanyi. <sup>13</sup> Sarevi nemire simunyavi tewaanya neyivaimwadivisaihiyi. Sare kiri' neyivaimwange' gave' mi'. Nemi yilaaya naanga yuna yivanigo. Sarimi yuyaihi tewaanna yadivi' Taaitazare kuryai kave mena yimwaaihivanigasa'na sahwai yilaaya yivani'. Gamire yilaaya sasare dazabwi wangadaa yi nemiji yilaaya naanga yuna yivanigo. <sup>14</sup> Sare' dare'nanyi. Sinnawi nimi Taaitazari widad' sariminne yaya' munyaba makile daza'na, yiwetawakya mye'na, nimore yagaala dazavi wagi'la mamaariwa. Aawa. Yuya yagaala nemi yihitho daza yi naanga nebulya'nanya warikabaai' yi savi

Taaitazaryaba sariminne yaya' munyaba makilo yagaala daza' yagaala naanga nebulya'nanyasi. <sup>15</sup> Taaitazai sariminyawinna kabi'mava' yi sarimi "Yiwetawakya nyaadikaji," lika yawaaineva sahwar maaresalyi. Yi sarimi yuyaihi sahware yagaalya' midinna yesaihiyi. Sahwai yune dazahbwina yawi'da yi gamire simunyi yawiririkirakya sariminyawinna yuna wa'daawadelyi. <sup>16</sup> Dahaa' nimi nebulya' diraginna dara limwamwa. Sarimi saihi yuya yidata sabura nayaa nebulya'na jideihiyi. Yi sasare saburi nimi yilaaya yivanige.

## 8

*Kiraazitiyar* *limwadiwisa*  
*kwiyamweraavina yanga wijaavesa'nesi.*

<sup>1</sup> Nya'mweih, dahaa' nemi dara yihiziwiryaana! Piroviji Maazathoniya Kiraazitiyare kusilaanyangiyaraavi Gotiyai yanga wigaimwadaa'nyi sahwar nawi'nyina yiwaasare. <sup>2</sup> Kiraazitiyarina sahwaravi taanga naange' kima'na' yi sahwaravire simunyavi taanginya sabwi yaamiji yijiwaala yakebulyi. Yijiwaala dazaburi sahwar kayaa'na nebulya'na mwaalesare. Kiri' sahwar yune yilaaya naanga nebulya'nanya' kininnakere. Nabaai sahwar yune kewewini gilyivita maayare. Yi sarevi dazahwar piwinya kwiyamweraavi gaimwagya'ne simunya diraginna nayaa yawiramaa'divisare. <sup>3</sup> Sare' dare'nanyi. Nimi nayaa wangadi jalikurakivanige. Kumire nigwia maalikengi

nigwia yanga wijaaya'ne kininnakera yune sara wijaavadivisare. Yo, sahiburi wavila'divi' nigwia piniji wijaavadivisare. Kunnya simunyaburi middivi' nigwia daza wakadivisangi. <sup>4</sup> Yi sahwara neminyi diraginna nedadivi' yidaanganna “Wawinya Gotiyare tewaanyara Juthiya mwaalyaraavine yanga gaimwange' nemi wijaaya'neinaavi dinejila! ‘Naanga sabwi mi nyaadika!’ dona yihithivanigo. Kave mwaaihasa! aawa! Kusilaanyangiya pwaraji sara yirakurayaana!” <sup>5</sup> Sinnawi nemi dara limwagaro. Sahwara nigwia pini pwaraavina wijaavipi'dererera. Sare kiri' yune sasare yipine'na mi'. Aawa. Aayagaa' Naangerina kuminyidaasi wijaavineva Gotiyare simunyavi middivi' yi sara ya'nera nemi kwainaavinaji kuminyi wijaavin+waa'. <sup>6</sup> Maazathoniya mwaalyaraavine sare' nemi Taaitazari yaamiji widiwo. “Yi sinnawi sagaa' sahwai pwaraavi nigwianna wawinya wigaimwanga daza' Koridi mwaalyara ya'neraavi gaai widakabaabi' widihaa'bwarana! Sarevi sahwaraayaba yanga gaimwanga nawi'nya sa' nayaa yi'mwannana!” yawirona sara yaamiji widiwo. <sup>7</sup> Yuyaburaavi sarimi yunebanna tewaanna yadivisaihiyi. Yi Kirazitiyari diraginna yunebanna limwadivi', yi Kirazitiyari yagaala yuna diraginna wijiwaakadivi' yi yune simunya nawi'nya kininnakeihiyi. Yi sarevi sarimi Gotiyare wawinya ya sabwina yunebanna nebulya'na dikaa'divi' yi neminyina yunebanna nebulya'na yihivu'nadeihiyi. Yi sasare saihi yunebanna

tewaanna yadiv+tabaabi' dahaa' "Yanga gaimwanga nawi'nya dazabwi yi, yunebanna wijaayabwi yaana!" dapiji sara jila!

<sup>8</sup> Savina nimi kiwinya dakya'ne' mihizivanige. Aawa. Maazathoniya mwaalyara a'mwe pwaraavina nebulya'na dikaa'divi' tewaanya yadivisanna jalikurakena sarimire kale saburi yaamiji yihivanige. Sa' nemi yawiraade'na sarimire kale sabwi sa' naanga nebulya'nanya' sahwaravire'bisasira. <sup>9</sup> Sare' darevinyi. Sarimi mena dara yawi'maniga'. Nemire Naangei Jizaazai Kiraazitiyare yanga gaimwanga nawi'nyaange'na yake'nanyi. Yi sahwai nawi'nya naangengi aaya kaavilyalyi. Kiri' sariminyi gaimwanga yihya'nei gilyivita maayai yima'nakelyi. Yi sariminyina "Waryaanya sabwi limwadinyavi nawi'nya naange kininnakera yima'nipika!" daka sarei yima'nakelyira. Sara mena yawi'maniga'. <sup>10</sup> Yi yihithivanige' kiwinya'na mi'. Dahaa' daza' nimir simunya' yihiz+waakivanige. Sare' darevinyi. Yi dare' sariminyine tewaanyasira. Kwaramenanyariki sarimi wawinya daza' mena dihaa'bwareta gave'na mi'. Aawa. Sareihi sinnawi sarimire simunyavi wawinya ya'na tewaanya kuna yihivu'nakeihilyi. <sup>11</sup> Yi nabaai dahaa' wawinya daza' ya'ne' sarimi nayaa yimwanniyina jideihilyi. Kigaa' daza'na simunyavi yime'nya'bi' dihaa'bwaretabaabi' sarinnya gilyivisangina yinigevanna wil'nanya'na sarimi yunebanna yime'nya'bi' jiwagyila! <sup>12</sup> Sare' darevinyi. A'mwei nigwia wijaaya'na tewaanna



wiv'u'najai yi Gotiyai dazare sabwina tewaanya wima'nadelyi. Gotiyai yuya a'mwe dazari wivarajanna kunya yawi'da yi sahware wijaavade sanna maryawibwa'delyi. Sahwari nigwia naanga muwarikenna marayawibwa'dei mi'. <sup>13</sup> Sare' darevinyi. "Sariminyi taanginya yihyana! Pwaraavi wivwa'bwarakana!" dena yihithivanige' mi'. Aawa. Sariminyiji pwaraaviji avaaina yima'nya'ne'nanyi. <sup>14</sup> Yi dathahaasagaa' sarimire gilyivita kwalaalya yi a'mwe gilyivisanna yinahune yima'nadivisaraavi yunebanna wiadengi. "Yi sarevadaa'nyi divi sarimi gilyivisanna kune yima'nipija' yi sahwaraavi kwalaalya naanga wivaradera sariminyi gilyivisa yunebanna yhipika!" dena yihithivanige. Yi sasare dazabwina sariminyiji sahwaraaviji avaaina yima'nade'nanyi. <sup>15</sup> Sara yapiji yi dare' Gotiyare bukuyavi dinikabaabisasi. A'mwei wapaaya manaaya kwalaalya maaraka sai kwalaalya naange kininnakai mi'. Nabaai a'mwei maali'na maaraka sai wigainadei mi'. Yi sasarebaaibi' naange kininnakeihi mwaabizaihi wigainaderaavina yanga duzaayila!

*Taaitazalyi pwaraalyi yange'ne wawinya'na Koridina wawesa'nesi.*

<sup>16</sup> Nimi Gotiyari suya wdivanige. Sahwai Taaitazare simunyavi yidikaamanikelyi. Sara yadaa'nyi Taaitazai nemibi' avaaina yawi'mani'. Yi sai kwalyi sariminyine'na tewaanya wivunivan'i'. <sup>17</sup> Sare' dare'nanyi.

Sai nemire yivaimwange' maa'mwa'. Nabaai sai kwalyi wawinya savina tewaanya yaginna wivu'nivani'. Sarev+daa'nyi yune gannya sabur+nanya' sarim+nyaw+inna w+waka. <sup>18</sup> Yi nemi neya'mwe pwai maryaasiwoyai salyi ye'mwanniguwaai. Yuya kusilaanya sangi neya'mwe dazai yagaala tewaanya' wijiwaakyarine yaya' munyaba makimanigasalyi. <sup>19</sup> Nabaai yune sasare'nanya' mi'. Aawa. Kusilaanyangine a'mwera widah+lak+wa'daata sai divi nemiji ye'mwannayamarya'nelyi yanga gaimwanga daza' Jeruzaalemine Kiraaziti+yaraavina makwawaade'nanyi. Yi nemi wawinya widayadaanya daza' yi Naangerine byaanna diraginya' a'mweraavi yibwar+daakwia'nesi. Nabaai nemire simunya' gily+vi'maayaraavi wigaimwagya'ne daza' ya'na ney+w+rivanike' yibwar+daakwia'nesi. <sup>20</sup> Nemi yanga naanga maremwaala'na yivanigo savine yiwetawakya'na nyima'nadika! Sare' a'mwe aane pwai kwai yagaala kayaa'nanya' nadathika! Sarev+daa'nyi yi nemi neya'mwe dazai ye'mwannigwikade'na maryaasiwo. <sup>21</sup> Sare' darevinyi. Tewaanya naw+'nya yade sabwina nemi yawirona yune Naangere t+inna sarinanna mi'. Aawa. A'mwe kwaraavire t+inna kwariji nayaa yivanigo. <sup>22</sup> Nabaai nemi neya'mwe pwai maryaasiwoyai sarei saraalyi ye'mwanniguwa'. Kwalaalya saaminyagaa' nemi sari wawinya dala pininna pininnanyangi yidakwasangadaanyalyi. Yi nemi sari t+inna wangadaawoji Naangere wawinya ya'na

diraginna yadelyi. Dahaa' sai "Sarimi Koridi mwaalyaihi yune nawi'nyaangebawina jide'na," diraginna limwaga'manikei wawinya daza' ya'na dikaa'da diraginya yaginna yivanikelyi. <sup>23</sup> Taaitazarina sarimi dara jawiranganyidelyi. Sai nimiji ye'mwannayadasalyi. Sariminyine'na nimiji avaiwawinyalyi. Yi neya'mwe pwaraai saraarina sarimi dara jawiranganyide. Kiraazitiyare kusilaanyangine yawisanna yadisaraalyi. Yi saraai kirinnya wawinya savina pwara Kiraazitiyarine yaya' byaannake' munyaba makidivisaraalyi. <sup>24</sup> Sarevadaa'nyi sarimire kale' saraavi nayaa jivwaridaakwila! Nabaai sarimi nawi'nya ya'ne' sariminyine yaya' munyaba makimwo sa' nebulya'nanya' jivwaridaakwila! Yi sahwaraji kusilaanya anga geva gevanya a'mweraji naanga nebulya'na yihyawirangabi'de'na sara jila!

## 9

<sup>1</sup> Sare' da'darevinyi. Yanga wijaaya' Gotiyare tewaanyaraavi widaaya'ne'na sarimi mena yawi'maniga'. Savina yi nimi yagaala saaminya' mida'muna! Sarevina manyigainyadesira. <sup>2</sup> Sare' darevinyi. Nimi sarimire simunya' yihthikaa'manike' tivi'na yawi'manige. Yi Maazathoniya mwaalyara Kiraazitiyareraavi sariminne yaya' munyaba makidinyainyi. Yi dara widivanige. Kwarama sinnawinyavi Pirovijji Giriza mwaalyara daza' aaya mudina yamaasa'na mena yoviravalimwagata yesare. Yi sahwarasarinnyina kadika wi'neva wawinya dazahir'i' ya'na diraginya yadaapi yi daza'

sahwara kwalaalya kwaraavi yidikaavakesi.  
<sup>3</sup> Sare kirɪ' yanga wijaaya'ne wawinya savina sariminyina yaya' munyaba makilya'na sa' yaasiwa'nanya' nyima'nadika! Sare'na sariminyawinna nya'mweraavi maryasiwaabe. Yi sinnawi nimi widevaabi' yi sarimi nayaa sara yoviravalimwagata jemwaalyide'na maryasiwaabe. <sup>4</sup> Sariminyawinna Maazathoniya mwaalyara nimiji nye'mwannigupijara sarimi nayaa yemwaala myadapi tinna yihwangabiza'na yi nemi wagila nama-raadika! Yi nabaai sarimi kwaihiyi wagila yihye'mwannamaraadeihi dingaka! Nemi sariminyina diraginna nebulya'na yawirakadaa sariminyina diraginna sara wido. <sup>5</sup> Sarevidaa'nyi nimi dara yawi'mwa. Nya'mwe saraavi nimi nayaa diraginna widima! Kumi sinnawi niminyi waanapiji sariminyawinna bi'mapi'de'nanyi. Yi sarimi tewaanya naanga yanga wia'neihi mena dahesa' nayaa tivi'na yovirawakapiji ba'mujiyagaa' nigwimaaya saraavina maryasaabya'ne' mena waradesi. Yi yanga daza' tewaanya naanga yanga wia'bi' yi yemwaala yadesi. Nemi yihimwagi'nadaanya' nigwiabita' mi'.

<sup>6</sup> Yi pwaraavina yanga wijaayabwi dadesi. A'mwei tika munne maalina buridei, nabaai sai yune tika munne maalikenna maaradelyi. Yi a'mwe tewaanya naanga yange'na buridei, nabaai sai kwalaalya naanga yange'na maaradelyi. <sup>7</sup> Sabaabi' sariminyidaa'nya gazaizai gannya simunyavi mena yawirakoji yi yune sahiburina midinoji

sara wijaavana! Yi sai yanga wijaaya'na simunya' taanga nuyadika! Sahwai dara yawi'da "A'mwera diraginna nyivanigasa'na yi sasare sah+bur+ wijaavan+geiny+," nujaavadika! Sare' dareviny+. Nigwiyange'na a'mwei yilaaya yaderina yi Gotiyari tewaanya wivu'nivan+ke'nany+.

<sup>8</sup> Yi Gotiyai sahwai sariminy+ne'na yiniga wi'na yannely+. Yi sariminy+na yanga gaimwanga yuya wijaavada yi sarimi nebulya' yunebanna yihyadeihily+. Sahwai "Yuyagaa' yuyangi gily+v+ta yuyanna kininnakeihi my+h+gainyadeihi yiniga nebulya' wi'nanyaihi yuna mwaalina jila! Yi wawinya tewaanya yuya sa ya'neihi d+mwaaly+la!" dada yunebanna yihyadeihily+.

<sup>9</sup> Gotiyare bukuyav+ yangeraav+na dara din+kabaaib+sasi. A'mwera wia burija'ne piraih+ray+w+nasi'+namaryad+vitabaai A'mwei gily+v'+maayaraav+na naanga yanga wijaavakely+.

Yuyagaa' yuyagaa' sahwara yida'maraangebwi waragothely+.

<sup>10</sup> Gotiyai wia burija'ne a'mweraav+na yanga wijaavadei yi sahwai wapaaya dala pininna pininna nya'ne yih+zavadaawori sareihi yuyaihi tika nayaa d+nyideihily+. Yi Gotiyai gily+v+isangi (wiangi) sarimi yiniga wi'nanya pwaraav+na wijaaya'neih+r+na yih+zaavadely+. Yi a'mwera tika wapaaya wia burid+v+isa yi sare naanga yima'nadevaabi' sarimire gily+v+isa naanga (sila naanga, wapaaya naanga) yima'nadaa'ny+ yanga naw+'nyabwi yida'maraangebwi naanna kuna jideihily+.

<sup>11</sup> Yi gazazangi sarimi gily+v+ta kwalaalya yunebanna yihwakadeihily+.

Gilyivita kwalaalyangidaa'nya pwaraavi yanga yiniga wi'na wijaaya'ne yihwakadeihilyi. Yi nemire wawinya savi sihumale sarimire daza' neya'mweraavi gaimwagathe'na Gotiyari “Su! Su!” widipi'dere. <sup>12</sup> Sare' dare'nanyi. Gotiyare a'mwe tewaanyaraavi gaimwanga ya'ne' jide wawinya', sasare saburi sahwaravire gilyivisanna mudaasaderaavi yunebanna yivani'. Nabaai yune sasare' mi'. Aawa. Sasare dazaburi kwalaalyara yadaapiya'na yilaayasi Gotiyari “Su! Su!” wijasi maanga yuneba wiresi'nawidihita yade'nanyi. <sup>13</sup> Yi sarimi wawinya yivanigata daza' sarimire yadivita sabwi ku'maayaba marima'naabathesi. Yi sarimi Kiraazitiyare yagaala tewaanya' nayaa jalikurakadivisaburi kwaakewi mwaaihasa'naji yi nabaai Juthiya mwaalyaraavina yanga naange' nayaa wjavadaapi sahwaraji a'mwe yuya pwara kwaraji sarimire ye'mwannayivanigasa' wangabi'de'naji yi sahwaru Gotiyar'ne yaya' byaannake' munyaba makibi'dere. <sup>14</sup> Nabaai sahwaru yawipi'de'na “Gotiyare yanga gaimwange' wavila'nike' yihwaradesi.” Sarevi yi nabaai sahwaru sariminyi wanganya'nera sariminyina tewaanya wivu'naderera. Yi sara yadivi' Gotiyari “Su! Su!” widadivi' yidaanganna kyapiji sahwai tewaanya yihyatheihilyi. <sup>15</sup> Gotiyai gannya Gawaaliki yanga nejaavakelyi. Yanga sa' naangaangesi. Nemi daza' yiniga wi'na yunebanna yawi'daa daathe' mi'. Yi yanga daza'na nemi Gotiyari “Su! Su!” diraginna widaana!

# 10

*Apozeliyaraavi kayaakyagaala widesa' Poli walamarakake'nesi.*

<sup>1</sup> A'mwe pwara niminiyina kwaasi yagaalya' dara dadiviki "Sahwai nemiji neye'mwannemwaaida gami sarine yaya' kwaakewi marima'nadelyi. Kiri' nabaai gami menyaba mwaaida sahwai yagaala diraginaange nedasaabadelyi." Polinyi nimi sainyi Kiraazitiyare kwaamu'nanyabulyi bwiwanna maremwaalyabulyi nayaa mididi sareinyi kave diragina yithivanige. <sup>2</sup> Yi dara yihidaangamanige. Dividaa'nyi nimi sariminyawinna kabi'mava'muji yi a'mwe sahwara mala nayaa yiwannipika! Akai, a'mwe sahwaraavi nimi yagaala diraginya' nudiwika! Sahwara neminyina dara yawi'divisa'na "Kilaakejikiya yawita saburi yamaryadivikira," nayaa diragina widide'nanyi. Sara diragina yawirangamanige' kiri' baa'nana! Simunya yarai kyavada'galayawirapiji sara myavada'galyi yihyiwineinyi. <sup>3</sup> Kilaakejikiya yawita saburi myamaryadaanyi. Sare' darevinyi. Kilaakejiki yamaryadaa kiri' kayaa'nanya neyima'nadaa'nyi kilaakejikiya yawita saburina kayaa'nanya dathiwadaanyaine. <sup>4</sup> Sare' darevinyi. Yuyaji mala tannya'ne sa nemi limwagako sa kilaakejikiya yawita saburiyanna mi'. Aawa. Sa Gotiyare diraginya' kininnakenna yikamaangeraavire maihurita diraginya yiniga wi'na wo'dalasi'nade'na. <sup>5</sup> Nemi

sahwaraavire simunya wo'daidaanyaine. Nabaai yuya sabura munya ke'beva daa'da a'mwera "Gotiyari yawiranganaana!" dadivi' yadivisaraavine tusa' kaanya tihidevura, sabura kiburaji wo'daidaanyasi. Yi sara yadaa nemi a'mweinaavire yawita yuya sa Kiraazitiyari midinya'nengina kalavuzayiralimwaga'daanyaine. <sup>6</sup> Yi nemi mena yawibwa'nona sariminyina yemwaala yigo. Sarimi nemire yuya yagaala sa dinemidinyidehaa' yi nabaai nemi yagaalya' galazekivaidivita a'mwe yuyaraavi kumire kayaa'nanyabwina wirivikiraadeine. Sareina yawiralimwagata yivanigoinera.

<sup>7</sup> Sarimire tinnyangi yihwarika dazanna Apozeliyainaavinenna nayaa jawiranganyila! Yi a'mwe pwai kwai yune gami sarina diraginna limwaga'da "Nimi Kiraazitiyareinyi mwaihe," yi sai simunya' ayahi yawirana! Gannya simunyavine'na yoji dara yawirana! "Yi nimi Kiraazitiyareinyi mwaihebaaibi! Poliji Apozeliya pwaraji Kiraazitiyarera." <sup>8</sup> Sare' darevinyi. Naangei neminyina sarimire diraginna limwangebwi diraginya yihiwagaathe'na gannya diraginya' nejaavakeine. Sa' sariminyi kayaaka yihigalakaade'na mi!. Yi diraginya sa'na nimi yune neminne yaya sanna makilaaja' yi sa'na wagila maarideinyi mi!. <sup>9</sup> Kiri' nimi "Aala!" diwa. Sarimi neminyina dara yawi'maniga' "Gamire paazyangi neminyi lika dahaneyirigaimani!". Sare' sarimi yawisa'na "Aala!" dadi mi'na yihithiwa.



<sup>10</sup> Sare' dare'nanyi. A'mwe pwara niminyina dara dadivisare “Yo, gamire paaziya naanga kininnake yi yagaala diraginya kininnakengi. Kiri' gami sai kabi'mavoji nemu gamire kilaakejiki tinna wangadaawori diraginya maayalyi. Yi sagaa' gamire yagaalya' yaasiwa'nanyasi.” <sup>11</sup> Sasarera nayaa dara yawipika! Nemu sariminyi menya keibeva yibwa'nadozi yune yagaalya' sariminyina pikarya yida'daanya' yi nabaai nemu sarimiji yihye'mwannamwalaaja' nemu avainanyabwi yagaala sa' sara yihyadaanyasi.

<sup>12</sup> Sare' darevinyi. Nemu simunya kwalaalya yawi'manigo. Yi “A'mwe pwarabi' avainanyainera!” nemu yiniga wi'na daanneina mi'. Sahwara yune kuminne yayanna munyaba makinadivisare. Yi nemire sabulyi akwaraavire sabulyi yiniga wi'na maryawibwaraanneina mi'. Aawa. A'mwe dazara yune kumire saburine yaamijita wakadivi' “Tewaanyainera,” maryawibwa'divisare. Sahwara kumire yawisangina maryawibwa'nadivisare. Yi sarera simunya maayare. Kwaakevakiyara kunnya yawisabwina nayaa maryawibwa'nadivisara mi'. <sup>13</sup> Sahwara sara yadivi' kiri' Apozeliyaina neminne yaya' munyaba makilyavina nemire yitaasavi wavilavaadeina mi'. Aawa. Yitaata savu Gotiyai yaamijita wakada yitaasa' maryawibwaraka yanga nejaava'. Nemu yitaata yune dazahirivina mididaanyaine. Nemu sahirivi kusawi midinona sarimi kwaihiryawinna bi'mavoine. <sup>14</sup> Sare' darevinyi. Nemu sariminyawinna

mabi'mayi yaaji kwaji nemire yitaasavi kavari'mavaadikebaaibi' pilaanna nemi saina diraginna wawila'manigoina mi'. Aawa. Sare' darevinyi. Sinnawi sariminyawinna bi'mavona sariminyawinna Kiraazitiyarine yagaala tewaanya' yihimakabovina sarimi nemire yitaasavi mwaaiha'. <sup>15</sup> Wawinya piningi a'mwe pwara gaalyagaa' miraagikiresangina neminne yaya' mamakilyivanigo. Nemire yitaasavi Gotiyai dahilakaka wawinya savi mavari'mayona sara mi. Aawa. Nemi simunya diraginya dara yawirakivanigo. Sarimire diraginna limwangebwi sarimire simunyavi diraginaanga mena kima'noji nemire yitaasavi yinigeva wawinya sa' yunebanna yimwannaaade'nanyi'. <sup>16</sup> Yi sariminyi bulymagi mwaaihata kwaaka pimagina Naangerina kadika mu'nyadiv+saraayawinna nemi yagaala tewaanya' wijiwakamaryaade'nanyi'. Nemire yitaasavi pari'makwiya yaadeina mi'. A'mwe pware yaamijita wakinikeba mena yakengina neminne yaya' yaasiwa' makilanneina mi'. “Wawinya sa' nemi saina yagosira,” majadaanyainera. <sup>17</sup> Aawa. “A'mwe gaminne yaya' munyaba makidei yi Naangerina gaverina nayaa sara makilana!” <sup>18</sup> Sare' darevinyi. A'mwe yune gannya yaya'na munyaba makilajai yi dazari Gotiyai yawiramaardei mi'. Aawa. A'mwe Naangei gamire yaya' makilajai yune a'mwe sahwari yawiramaardeyi'.

*Polì kwaasì apozelìyaraavìrebwi ku'maayaba jalìkurakake'nesì.*

<sup>1</sup> Akai, dara nyìvu'nìvanìkeinyì. Nìmì sìmumaaya maalì'nanya yagaala kave du'nyìla! Maanga yarai manyìdìpìnera! Kiri' yìhìthìwe' baa'neka! Sarìmì maanga majì, nayaa kave nyu'nadìvìsaihìlyì. <sup>2</sup> Sare' darevìnyì. Gotìyarìdaa'nya wìvu'nyabwina sarìmìnyìne tewaanya nyìvu'nadeihìlyì. Gotìyai a'mweraavìna “Nìnnya'neraavì dahìlakìma!” dada yì sasare dazahìburì sarìmìnyìna diragìnna yawì'manìge. Sare' darevìnyì. Gave pwarìna kwala maa'nya'na sarìmìnyì mena yìhìthahìlakìweihìlyì. Yì sahwai Kìraazìtìyalì. Yì sahwaihi a'mwazìdìraaya tewaanya' mwaaide'bìsaihìrì Kìraazìtìyarìna yìhìmaakìdeihìlyì. <sup>3</sup> Kiri' nabaai nìmì lìka dara yìwa. Kamaala sai kwaasìya sabwina sìmunya naanga yawì'dei sìnnawì kìgaa' Yìvavì kwaasì yagaala sa' wìjaakabaaibì' sasare sabwi nayìhìma'nadìka! Sarìmìre sìmunyangì yune Kìraazìtìyarìne yawìta dazabulyì yune gamìnyìna tewaanna yìda'na yìhìvu'nya dazabulyì yìhwarìkebulyì. Akai, sarevìna sarìmìre sìmunya sa kayaaka nayìhìgalakadìka! Nìmì daza'na lìka yìvanìge. <sup>4</sup> Sare' darevìnyì. A'mwe kwai sarìmìnyawìnna yìma'naabada Jìzaaza pwarìna yìhìzìwaakadei. Nemì yìhìzìwaakoyai yì Jìzaazai sahwarìna mì'. Yì sasare dazaburì sarìmì kurya nabinanyai maa'dìvìsaihìlyì. Sìnnawì sarìmì maareta Kurya Tewaanya dazaina mì'. Yì sarìmì yagaala tewaanya nabinanya' maa'manìga'. Sìnnawì

sarim#i yagaala tewaanya maareta daza'na mi'. A'mwe sai sarim#inyi tinnyaba sasare sabwi yadei yi sahwari kave wi'nivanigasaihile!  
 5 Sare' darevinyi. Nim#i dara yawi'manige. Mudikera sara yihithadivi' nabaai, "Apozeliya nawi'nyaanga wavila'nikeine," dadivisaraavi dalaangewi aane piburina kiburina maal'na wila'nata mijivanigena! 6 Kiri' yagaala wijavi nim#i nayaa miwirinikeinyi dhamwaaie? Baa'nana! Sare kiri' nim#i simunya yawisa'na kuna manyimudaasivani'. Aawa. Sarim#inyina yuya simunya yawita yuya sa nemi yadaanya yuya saburana yhibwaridaakwo.

7 Nim#i Gotiyare yagaala tewaanya' yange'na yihiziwaakeinyi. Yi sara yadi nim#i savina nigwia maareinyi mi'. "Yagaala nebulya' yihiziwaakadi sarim#inyi munyaba makilima!" dena nigwia mamaarya dazaburi nim#i sainyi walarake. Sara yene'na nim#i dazabwi ye' yiwetawakyabwi dingaka? 8 Kiraazitiyare kusilaanya piningi sarim#inyi yihithaaya'nevi nim#inyi nyigaimwagya'ne nigwia maareinyi. Yi sasare saburi sahwaraavire gilyivisa nim#i yaasiwa' mwagi'nyabisasi. Kumire widaayavina mi'. Sarim#inyine'nanyi. 9 Sinnawi nim#i sarim#iji yihye'mwannemwaalena yi nim#i gilyivisanna nyigainakegaa' yi dazagaa' sarim#ijiya a'mwe aane pwarina kwarina taanga wijaaveinyi mi'. Sare' darevinyi. Neyamwerana Maazathoniyadaa'nyara anga Koridina yimaveva gilyivita nyigainadaasiya sahwara yunebanna ye'. Yi gilyivita yuya nim#i nayaa yavada'gainadi sarim#inyina nim#i

taanga pimi! kimi! mayihizaaye. Nabaai divi yuyagaa' yi nimi nayaa kuna sara yideinyi. <sup>10</sup> Yagaala nebulya'nanya Kiraazitiyare' sa' niminiyih sahwayih nyari!. Sarev'idaa'nyih yuya Pirovijih Giriza simagih niminne yaya' munyaba makidih yadinyah dazabwina a'mwe aane pwai nimirere tusa' yaya' makilya'ne' kaanya yiniga wi'na tihiradei mi!. <sup>11</sup> Nimi sasare sa' baari'na yivanigena? Nimi sariminyihna tewaanya manyivu'nyivanikeinyih dingaka! Aawa. Gotiyai mena nyawi'mani!. Nimi sariminyih nyivu'nadeinyih. <sup>12</sup> Sare kirih' "Pwara kuminne yaya' munyaba makilya'ne tusa'na 'Polimiva avaa'ina yadiv'itabaai' sabwina biraana!' dadiv'ih' yaamijih yina yadaapi 'Tuta sa' kaanya tihirima!' dena sarimire nigwia maa'dinyainyih mi!. Yi nabaai nimi yune sasara yideinyih." <sup>13</sup> Sare' darevinyih. A'mwe dazara kwaasiya apozeliyare. Sahwara kwaasih yadiv'isare. Sahwara kumirebwi marovinyah yadiv'ih' yune kilaa'kejikina "Kiraazitiyare Apozeliyainera," dahilakimaniga!. <sup>14</sup> Yi dazav'ine'na sarimih' atika mamaru'napina! Sare' dare'nesih. Saataani gamih' sai gannya kwaasiyabwi marovinada yune kilaa'kejikinyah' sai baakev'iyah' ejeliyaibih' yima'nadelyih. <sup>15</sup> Sasare sav'idaa'nyih' gamire widaayadiv'ita a'mwera kwarajih' kumirebwi kwaasih' marovinyah' yadiv'ih' a'mwe yida'maraangebwi yadiv'isarabisarah' kwaasih' yima'nadiv'isah' naange' daaka! Yi a'mwe sahwarah' dividah'nyih' kumire kwaasih' yadiv'itah' sabwina tiv'ikita kayah'nanyah' maapi'dere. Kumire aayagah'ne' kayah'nanyah' sahirih' wari!.

16 Sinnawî mena yîhîthîwe' nîmî ayahi yîhîthîma! A'mwe pwai kwai nîmînyîna dara nyawîradî' "Sai a'mwe sîmumaayalyî." Kîrî' sare' yawîrya'neihîrî yîhîvu'naja' "Nîmî kwainyîjî sîmumaayaibîsainyî nîmînne yaya' munyaba makîlîma!" kada'mujî kave dînyu'naabyîla! 17 Nîmî Naangei yakebwi mamîdînyadî yagaala dara majîvanîge. Aawa. Sîmumaayaibî' yagaalya' yaya' munyaba makîlya'na nîmî dîragînna yîvanîge' dara dahathîvanîge. 18 A'mwe kwalaalyara kîlaakejîkiyabwi mîdîdîvî' yî kumînne yune yaya sangîna munyaba makîmanîgasavî yî dahaa' nîmî kwainyîjî yaya' munyaba maalî'na makîlîdeinyî. 19 Sare' dare'nesî. Sarîmî a'mwe sîmumaayaraavi kwaasî yagaala yîhîzîwaakadîvîsaraavi yîlaaya'na kave wî'nîvanîga'. Sarevî sîmunya tewaanya' kînînnakeihi daa! 20 Sare' darevînyî. A'mwe pwai kwai gamîre yaasîwa'wawînya'na yîhîmwagi'namakabaza' yî sai sarîmîre gîlyîvîta yuya yunebanna yaja' yî sai gamîre kwaasîya'na yîhîgalaja' yî sai kayaa'na yîhibwaakaja' yî sai sarîmîre sîdalengî mala yîhîramaja' yî sara yîhyadaawori sare sarî kave nayaa wî'nîvanîgasaihîle! 21 We! Sasare kayaa'nanya sabwi ya'ne sahwarâ yadîvîsanna nemî dîragînya maayaine. Sarevî yî nîmî savîna jalîkurakîwe' yî nîmî wagîlya' nyîvwa'nanneinye!

Nabaai a'mwe pwai kwai dîragînna yada gannya sabwina jalîkurakadevurîna yî dazahîburîna nîmî kwainyîjî dîragînya

yadi jalikurakideinyi. Sara diwe' a'mwe simumaayainyibi' diwebaaibisasi. <sup>22</sup> Sahwara Yiviruyara dingaka? Yi nimi kwainyijinyi. Ne Jaikopi+mdaa'nyara Yizireliyara dingaka? Yi nimi kwainyiji. Ne Eviiraam+mire yisiwara dingaka? Yi nimi kwainyiji. <sup>23</sup> Kiraazitiyar+ widaayadivitara dingaka? A'mwe wana sidu'maaya yune navi'navika nebulya'nanyaibisainyi dara dima! Yi nimi wavila'dinyainyi. Yagi+yagi wawinya kwalaalya naangengina wavila'na. Nimire wawinya'na kalavuzi kwalaalya naangengi yirakesangina wavila'na. A'mwera niminyi mala naange nyiradaap+ri yi dazavi sahwarav+ nebulya'na wavila'na. Kwalaalyagaa' nebawa kabaimudikeinye! <sup>24</sup> Yi yirika dahasaai dahasaai dahaa' sarevi Juyara wila kayaa'nanyabaaly+ nyili'bware'. Kuna nyili'bwa'divi' aaya' teti naainiyavi (39) tam+daakuna nyadiviki. Sarevi aya kiba nimi balig+rasainyi. <sup>25</sup> Yirika dahasaai dahaa' Romiyara yisarikaji nyirame'. Gave pigaa' a'mwe pwara siliyaji liwakina nye'. Gotiyare wawinya'na wodi yirika dahasaai dahaa' sipiya' kayaaka yinyina kya' nimi saalaalyavi yiwina kiwidikeinyi. Yi sarevidaa'nyi pigaa' sawita piril' yirite piril' saalaalya naangevi a'ba yilaramaryeinyi. <sup>26</sup> Nimire widaayaburi kwalaalyagaa' nimi tuta saaminyavi waweinyi. Aalya yarai bwalyawodaa'nyi yiwina kiwidikeinyi sara yeinyi. Yi a'mwe kuka yipalamaa'divisaraavire asiri saba sana yiwina kiwidikeinyi. Yi nimire yisavaakiyara Kiraazitiyarina sinna

tika wida'daa'nyi niminyina “Kayaaka yigalaana!” deva sara kanyiramakipidikeinyi. Yi a'mwe ajimya piningiya pwara sara kwaraji “Kayaaka yigalaana!” deva sara kanyiramakipidikeinyi. Yi anga naangeba sara yiwina kiwidikeyi. Yi kwaaka a'mwamaayavi sara yiwina kiwidikeyi. Yi saalaayavi sara yiwina kiwidikeyi. Yi a'mwe “Nemi Kiraazitiyareinera. Ja'mweinera,” kwaasi dadivisaraavire asiri sara yiwina kiwidikeyi. <sup>27</sup> Nimi wawinya kwalaalya yagiyagi sara yeinyi. Diraginna miragikireinyi. Kwalaalyagaa' sawi'wawinya yadi se wareinyi mi'. Miji'na mwaalina yadi aalya'na baleinyi. Kwalaalyagaa' Kiraazitiyare wawinya'na tika wapaaya yagalya'maveinyi. Nimi'nyi yirila nyadaa'nyi baazi'ma'nyanna kune nyima'nakeinyi. <sup>28</sup> Nabaai yune sahinanna mi'. Pini warike wavila'nikeinyina wibwaridaakuvanikengi. Yuya yirikerikaavi nimi Kiraazitiyare kusilaanya yuya sangi maremwalya'na simunya kwalaalya yawi'dinyainyi. Yi daza' taanginya naanga nebulya'nanya' nyakivani'. <sup>29</sup> Yi a'mwei Kiraazitiyari limwadei gamire kuryai diraginya maayai yojiya'na yi nimi kwainyi gamibi'na najinanyainyi ye'mwannamwaalideinyi midaaka! Yi a'mwe kayaa'nanyavi yidihwaki'naraawajai yi daza'na nimore simunyavi kale dusina, daanga naanga dike'bi' nyiginyiwannaradeinyi midaaka!

<sup>30</sup> Nabaai nimi yevina “Kwalaalyanna diji,” yawi'mujainyi yi nimi dara dideinyi. Nimi diraginya maayainyira. Yi dazavina



niminne yaya' munyaba nayaa makilideinyi.  
<sup>31</sup> Gotiyai, Naanga Jizaazari Ganimaangei sahwai  
 niminyina dara yawi'delyi "Sai kwaasi majiwa'."  
 Nemi yuyagaa'na sahwarine yaya' munyaba  
 makidaanyai sara yawi'delyi. <sup>32</sup> Yi sarimi  
 nayaa yawiranganya'neihiri "Poli diragina  
 maalyi," yithithima! Damaazikazi saba  
 Aaretazai Kingiyai mwaala'. Sarei kiyapiya  
 naangeri anga naanga Damaazikazi tikuryavi  
 maremwaalya'neri dahilakakelyi. Yi sahwai  
 dame daaya'nei niminyina "Kalavuzayiri!"  
 daka nyakelyi. <sup>33</sup> Sara kanya' nya'mwe pvara  
 soigilya naangevi lika wilanyimarulakeva  
 angebanya sikurikevi munyaba dabu'nikevi  
 niminyi wilyabaari makwasaabina nye'. Yithaa,  
 sara kanye' nemi walaabina yina yena likaanya  
 wina ye. Sarevidaa'nyi yi nemi kiyapiyare asiri  
 makwasakena yi nemi likaanya wina ye. Saza  
 yadinyainyi wirisainyi.

## 12

<sup>1</sup> Tusari' piri' mi'. Nimi yune niminne yaya'  
 munyaba makimujainyi. "Nebulyasi, sasare  
 dazabwi negaimwagathe' mi'," yawi'daanyai.  
 Sarevi kiri' a'mabaaitinna pininnaji lika  
 yulyakya piniji Naangei marima'naabadennaji  
 dide'nanyi. <sup>2</sup> Kiraazitiyari wilaamwaalika  
 pwari nemi mena yawirangadinyainyi. Yi  
 sahwaru kwarama potinya (14) kigaa' Gotiyai  
 gamireba Sigunyavi menya ke'mwewinna  
 yarai yipalamakilaawa'. Ai, sai kilaa'nakei  
 dhamwaala'? Nimi myawiriwa. Sai kilaa'keji'  
 yagalya'mata dahaya'? Nimi myawiriwa.

Gotiyai yune gave sahwaina yawi'dei. <sup>3</sup> Yi nimi a'mwe dazarina yawirangadinyainyi sahwari Gotiyai nawi'nyabanna Parathaazi wo'nikebanna makilaawakerina. Sai kilaa'nakei dahamwaala'? Sai kilaakeji' yagalya'mata dahaya'? Nimi myawiriwa. Gotiyai yawi'dei. <sup>4</sup> Sigunyaba sai kadika wi'naka yagaala sangi a'mwei yiniga wi'na dannei mi'. Yi Gotiyai daza kiri'naji kimaakiya dakina. <sup>5</sup> Sasareri yima'nakevina nimi gaminne yaya' munya ke'ba makilya'neinyi. Nimi'nyine'na nimirne yaya' munyaba mamakimuna! Kiri' nimirnyina gave piri'na dara dide'na "Nimi diraginya maayainyira," nimirne yaya' yiniga wi'na makilideinyi. <sup>6</sup> Sara yiwineinyi. Sare' darevinyi. "Nimirne yaya' makilima!" diwija' a'mwe navi'navikeinyibi' yideinyi mi'. Sare' darevinyi. Yi nimi yagaala nebulya'na diwineinyi. Kiri' yune nimirne yaya'na mamakilyivanige. A'mwe pwai nimirnyina dara nyawiradika! "Polii a'mwe wana nawi'nyaangelyira." Nimi yivanige sabwi sahwai tinna wangananneji nimi yagaala divanigengi kadika wi'nanneji sasare sahiningi simunya nayaa yida'na yawirade'na tewaanyasi. Nebulya' dingaka? Kwaasiya' dingakaji? <sup>7</sup> Yi yuya daza Gotiyai nyibwaridaakwake wana naanga nebulya'nanyanna "Yi gaminne yaya' gami saina naanna namakiladika!" daka sarevidaa'nyi Gotiyai lange'bisa' daange' nimir kilaaakejiki nyimulya'ne' nyijaava'. Yi daza! "Saataanimire ejeliyai Polimi mala wiramana!" daka nyijaava'. Nimi yune nimirnyine'na naanna namakimudide'na nimirny marulawakya

nya'nei daanga nyividelyi. <sup>8</sup> Dazavina “Naangei niminyi marasi'nana!” dena yirika dahasaai dahaa' diraginna yidaangane'nanyi. “Tewaanya mwaalima!” dena yidaangane. <sup>9</sup> Kiri' nabaai sahwai dara nyida' “Nimire yanga gaimwanga naangebwi giminyi yiniga wi'nannebulyi. Darevinyi. Nimire diraginya' a'mwe diraginya maayaraavi wawinya yuna nebwina wiadesi.” Sarevadaa'nyi “Taanga nanyadika!” madiwina! Nimi diraginya maayainyire wirita savine yaya' munyaba makidinyainyi. “Kiraazitiyare diraginya' yune niminyi nyarana!” dadi sara yide'nanyi. <sup>10</sup> Sarevadaa'nyi Kiraazitiyarine'na wirisangiji biraiyagaalyangiji nyigainyangiji kayaaka nyigaidengiji taanga dala pininna pininnanyangiji nimi wikira. Sare' dare'nesi. Nimi diraginya maayainyi mwaala'mujiyagaa' yi dazagaa' sagaa'na diraginya nebulya'nanya' kininnakeinyi.

<sup>11</sup> Nimi navi'navikeinyi yima'niwa. Kiri' nabaai nimi yadinyabwi nayaa myawiranganyawaasavi sarimi kyanyadika'mwa'daa' yi nimi sara yima'nenayagaala sa diwa. Sare' darevinyi. Sarimi niminne yaya' munyaba makibiza' sa' yida'nanyabulyi. Kiri' sarimi sasara yadivitaihi mi'. Sare' darevinyi. Nimi geinyira. Kiri' mudikera “Apozeliya nawinyaanga wavila'nikeine,” dadivita dazaraavi dalaangewi nimi mula'narige. Aane piri' kiri' manyimudaasadeinyi. <sup>12</sup> Nimire simunya' diraginya yuya yivaimwannadi sariminyaba Gotiyare wawinya' yadi apozeliya

kware wijiwaainya nebulya nimi marima'naabe. Sa yi darengi. Yijiwaainya dala pininna pininnanyaji atika maru'nasaji diraginya yaji sa yima'nikengi. <sup>13</sup> Sare' dare'nesi. Nimi yihye'na “Kiraazitiyare kusilaanya piningi naanga ya'. Neminyi maalika ya'.” Sara yawi'manigasaihi daaka! Nimi yadinya'na sariminyine pininna yihimudaasade dingaka! Yiyihimudaasade' gave pirinanya' daresi. Nimi sainyi gaveinyi sariminyi taanga yihizaaveinyi mi'. Sarimire gilyivisa yihimwagi'neinyi mi'. Nimore yiwetawakya dazawaai sarimi nayaa dimarasi'nyideihile!

<sup>14</sup> Yithaanyi, dahaa' sariminyawinna dahasaai dariki bide'na nimi yemwaala yiwa. Yi nabaai taanga mihizaayadi sarimire gilyivisa yihimwagi'nideinyi mi'. Sare' dare'nesi. Sarimire gilyivisa maarya'na nimi mabiramaariwa. Aawa. Nimi sarimi sahwhihiri maarya'na nyivu'nivani'. Sare' darevinyi. Kaimiraayara sahvara kuvinimaangeyuraavi gaimwagya'neyuraavi gilyivisa mari'bwarakya'nera wawinya maayarera. Aawa. Yune kuvinimaangeyura kaimiraayaraavi gaimwagya'neyura mari'bwarakya wawinya sa' kininnakeyurera. Nimi sirinimaangeibisainyi sara yihithiwa. <sup>15</sup> Yi yihigaimwagya'neinyi nimore gilyivita yuya wasisa'na, nimore gaala kibulyi wasisa'na. Yi sarevina nimi “Wikira,” dadinyainyi. Nimi sariminyina tewaanya naanga naanga nyivu'naja sarevadaa'nyi sahirivi tivikita ya'ne' nimityina sarimire yihivu'nyabwi yune

maali'nanya' jivanika! <sup>16</sup> Kir'i' nabaai pwara sahvara niminyina dara divaniga' "Nebulyasi. Sai sarimire gilyivisa ku'maayaba maarakei mi'. Aawa. Sai a'mwe nyili'nyilika dadelyi. Yi kwaasiyaburi sai sarimire sinnyikaavi lika yulya'mwagakya yada sariminyi yihimwagi'namaara'." <sup>17</sup> Mena maryasaabera a'mwe pwara sariminyawinna besaraavidaa'nyi kwaraavire asiri nimi kwaasi yena sarimire gilyivisa dahayihimwagi'ne! <sup>18</sup> Nimi Taaitazari kyadikaave yi sahwai sariminyawinna bakei, yi nimi neya'mwe pwai dazai maryasaabei sali ye'mwannigwawa'. Taaitazai sai kwaasi yaka sarimirena mwagi'nakei daaka! Gamiji sainaai simunya gave avainanyavi kaanya yamaryolyainaai midaaka! Tuta yune gave pirivina yibwaramakwadasainaai midaaka!

*Koridi mwaalyara yavada'gainya'neraavi  
"Mala nayaa jiwannyila!" widae'nesi.*

<sup>19</sup> Yagaala yuya dazangi sarimi danganapiji yi neminyina jawiryideihi dingaka? "Nemire tinnyari Polimivaavi marida'maya'ne' yida'mwakelyi." Kir'i' aawa. Gotiyare tinnyari nemi Kiraazitiyari wlamwaaihoina yagaala daza divanigo. Kir'i', sariminyina tewaanya nyivu'nadeihi, nemi yivanigo yuya sa, yi sariminyinenna diraginya yivaimwanga yihyadennanyi. <sup>20</sup> Sare' darevinyi. Yi nimi lika dara yivange nayihwangamudika! Sariminyawinna bi'mava'muji "O, sah-waraavina simunya nayaa yawirima!" diwija! kir'i' sarimi nayaa mamwaalyi yadivi' sareihiri

nayihwangamudika! Nabaai sarimi kwaihi “Poli neminyina yilaaya yana!” yawipija' kiri' nimi sainyi maanga yihiza'neinyi sareinyi nanyangabithika! Akai, sariminyaba kayaa'nanya dala pininna pininnanya dare naradika! Maanga dinyina, tiganaarya yawina, sinna tika davina, pimaginiyavakaavi maiyagaala dina, kayaakyagaala dina, bulayagaala dina, pihadika yibwaakina, gavamarasi'nyiyagaala dadivi' yina. Nimi dazanna yipija'na lika yivanige. <sup>21</sup> Akai, sariminyawinna ayahi kaba'muji yi sariminyina nimire Gotiyai niminyi nanyimarulawakadika! Yi a'mwe kwalaalyaraavi yavada'gaidi sahwaravina kinna nadiwidika! Sahwara sinnawi kayaa'nanyabwi yesara simunya mudikebwi myawiramaariwaa'. Yi sahwara kayaa'nanya girikita'nanyabwi yina, ata limwangebwi yina, dika widadaasi yina, yi sara yadivisaraavina kinna nadiwidika!

## 13

<sup>1</sup> Dahaa' sariminyawinna nimi bide dahasaai dahaakira. Mi'na bi'mava'muji yavada'galya'na dinike'na dara yideinyi. A'mwe pwaraai a'mwe kwaraai kwai avaaimaangi'na kajalikirakapiji yagaala daza' diraginya wa'da yagaainakeraavi yawibwarideinyi. <sup>2</sup> Sinnawi sagaa' yiwetawakya yesaraaviji sariminyi a'mwe yuya pwara kwara sara yawa'daasaraaviji yi pigasaalyagaa' sagaa' nimi sarimiji yihye'mwannamwaalena “Sarimire yiwetawakyangine tivikisa'na mala nayaa

jiwannyila!” yihithevaabi' yibwa'naweinyi ya'ne sabwina ayahi dara yihithivanige. Sariminyawinna ayahi ba'muri yiwetawakya yadivisaraavi yaaswa' wanganakina yideinyi mi'. <sup>3</sup> Sare' dathare'nanyi. Sarimi “Naanga nebulya'na yawiranganaaji ‘Kiraazitiyai Polimire maangevi dathei dingakaji,’ ” jawiranganyide. Kiraazitiyare diraginyavi yihyideinyi. Sahwai sariminyina wirisa'na yadei mi'. Aawa. Sahwai sariminyina diraginaangelyi. <sup>4</sup> Sare' darevinyi. Kigaa' sahwai wirita kininnakeri pwara yisaviri niliya wiramesalyi. Kiri' nabaai Gotiyari diraginya kininnakei gaalyai mwaali'. Sare' datharevinyi. Nemi sahwari wilamwaaihov' nemi kilaakejikaavi kwainaji diraginya maayaine. Aawa. Kiri' Gotiyare diraginyavi nemi sahwalyi gaala gamireina ye'mwannamwalaadeine. Yi nabaai nemi sariminyi yihyavada'galya'neina diraginya daza' marima'nabaatheine. <sup>5</sup> Sarimi nayaa jawiryide'na “Nemi Kiraazitiyari limwaga'manigoina daaka?” sarinnya simunyangi yaamiji jila! Sarimi saihi sahwaihiri nayaa jawiranganyila! “Neminyi Jizaazai Kiraazitiyai sahwai wilanemwaali',” myawirivanigasaihi daa! Nabaai aawana. Yi savina sarimi kwaasiyahiri jawirangannyideihi dingaka? <sup>6</sup> Yi nemi yawita yivanige. Sarimi neminyina dneyawiranganyide yawibwata dazavi yinigeva. Kwaasiyaina mi'. <sup>7</sup> Yi nemi Gotiyari yidangadaanyi. Yi sarimi kayaa'nanya aane pi'biwi kibwi mi jideihilyi. “Nemi yavada'galya'neina

yiniga mi'nanyaina ku'maayaba nayaa yima'nabaana!" dona sara yidangadaanyaina mi'. Aawa. "Yi sarimi tewaanyabwi jila!" dona yidangadaanyi. Sare' nevu'nivani'. Nemi yiniga wi'nanyaina ku'maayaba yima'nabaadeinaavi myawiranganya'ne'na wikira. Sariminyawinna bawaaji Kiraazitiyare diraginyasi yihyavada'galaade' wikira. <sup>8</sup> Sare' darevinyi. Nebulya' marulawakya'neina yiniga wi'na yaanneina mi'. Aawa. Nebulya' gaimwagya'neina yiniga wi'na yaanneinera. <sup>9</sup> Nabaai sare' darevinyi. Nemi wiriti kininnakeibisaina mwalaaja gazagaasagaa' nabaai sarimi diraginya' kininnakeihi mwaaibizagaa' nemi yilaaya yina yadaanyainera. Nabaai sarimi yavada'gainya'neihi tewaanya yida'maraanga nawinyaihi yima'nya'na yuyagaa' nemi Gotiyari widadaanyi. <sup>10</sup> Savidaa'nyi "Nimi yibwa'niveinyi sarimiji bihye'mwannamwaala'muji Naangere diraginyasi yarai davanganasa'na mihizi yima!" dena pikarya datha' yida'mwa. Diraginya daza' Naangei nyijaavake', yi daza' diraginna limwangeburi diraginya yiwagya'nesi. Sa' yawisangi kayaaka wo'dalasi'nya'ne' mi'.

*Yagaala pimaginya pininnesi.*

<sup>11</sup> Nya'mweih, dahaa' yagaala aaya' dima! Tewaanya dimwaalyila! Tewaanya yida'maraanga nawinyaihi yima'nya'neihi yavada'gainyina jila! Nimi're yagaalya' nayaa wi'namidinapiji sarinnya simunyangi



diraginiya yivaimwanyina jila! Simunya  
 avaananya' jawiramaarila! Kwaamu'nanyaburi  
 dimwaalyila! Sara yadivi' yi Gotiyai  
 tewaanya wivu'nyaburi aaya kaavilyai,  
 kwaamu'nanyaburi aaya kaavilyai, yi  
 sai sarimiji yihye'mwannamwaaladelyi.  
<sup>12</sup> Sariminyi gazaizai gya'mwe pwar  
 "Nya'mwei!" dada maangwidaayilaaya  
 tewaanya' yana! <sup>13</sup> Dava Gotiyare  
 tewaanya yuyara sariminyi "Neya'mweihi!"  
 yihithivaniga'.

<sup>14</sup> Naanga Jizaazai Kiraazitiyai sarimi  
 yuyaihiri yanga gaimwange' kuna yihwakana!  
 Gotiyari sarimi yuyaihirina tewaanya kuna  
 wivu'nana! Kurya Tewaanyai sarimi yuyaihiyi  
 kuna yihye'mwannamwaalana!

*Polii*

**Yipma Genesis and New Testament  
Genesis and The New Testament in the Yipma/Baruya  
language  
Buk Stat na Nupela Testamen long tokples Yipma long  
Niugini**

copyright © 1993, 1994 Wycliffe Bible Translators, Inc.

Language: Yipma (Baruya)

Translation by: Wycliffe Bible Translators

Video recording © The Jesus Film, a project of Cru.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 11 Nov 2022 from source files dated 9 Oct 2020

ef60f748-49e3-5ee0-8e6d-a25b74b7a93c